

Kristo da Gen Pasili Jon do Panalon An Ingut

But piso gen

On papia Jon da mandagit. Unun Jon dagin Gen Bin Tagisi gat ae 1 Jon, 2 Jon, ae 3 Jon kisi mandagit.

On papia unun amin da Yesu yolyol amin madepsi panupbal awit bisapmon Jon da mandagit. Yo yokwisi an yomgwit, nido Yesu yolyol amin unun Yesu Kristo do Amin Taginin yansi nandan gadan ingwit. On papia da Yesu yolyol amin dakon nandan gadatni panteban anakwan jigi madep unun da dima pabin yopjak yan do yosok.

On papia da yo don noman tokdan unun do tilak gen morapmi yosok. Yesu yolyol amin unun bisapmon egipgwit unun da tilak gen nandan pisawit, mani nandan gadatni mini amin dima nandawit. Tilak gen unun dakon mibili unun yan: Yesu Kristo unun Amin Tagi, ae unun da kisiron da Pin kop da uwalni kisi morap pabin yopdisak, anek Sunduk yo kisi abin yipdisak. Anek Yesu pini an mudosak bisapmon Pin kop da minat aminyo tebaisi agek nandan gadatni dima yipman dekwit amin do tomni yomdisak. Anakwan Pin kop gat egek ae sanbenek jigi dima pakdan, nido Pin kop da yo morap aeni pan kaluk an mudokdisak.

*Yesu Kristo da panmuwukbi 7 kabi do gen yipgut
(Kilapmi 1–3)*

¹ Gen on pasili tawit, ban Yesu Kristo da panjalon agit. Yesu da oman monjini yolisak do Pinjop da ingut. Yo unun tepmisi altokdan. Yesu da aneloni yabekban abin pi monjini nak Jonon gen on nayigit. Nak da pi monjini diwari yoliken yanon da nayigit. ² Yo morap noligit unun bamisi pindakim. Pinjop dakon gen ae Yesu Kristo dakon gen unun bamisi.

³ Pinjop yo morap noman toni do yagit unun dakon bisap kwan tosok, do amin kinda da on kombi gen panmuwukbi do manjin yomjak kan, unun kisik kisik tagi asak. Ae gen on mandabi unun nandanek guramitni amin, ununyo kisi kisik kisik ani.

Jon da panmuwukbi 7 kabi do gen mandagit

⁴ Nak Jon da panmuwukbi 7 kabi Esia Provinskon ekwan ji do gen on mandisat. Pinjop abisok egisak, ae kalipsigwan egipgut, ae don egipdisak unun da nandan yawok damanakwan butji yawori tosak. Ae wup 7 kabi Pinjop dakon kila amin madep yityit tamo da inamon ekwan ununyo kisi da nandan yawok damanakwan butji yawori tosak. ⁵ Yesu Kristo, Pinjop dakon gen bamisi yan tenjenok amin, unun kimoron da mibiltan pidagit. Ae unun kila amin madep morap miktimon ekwan unun dakon Amin Tagini. Unun kisi da but yawot nandan damanakwan butji yawori tosak.

Yesu da nin but dasi galak tan nimisak, ae iyi dakon yawi da yokwinin wiririk mudagit. ⁶ Yan anek nin unun gat amin kila anen do manjin

nipgut, ae iyi dakon Piŋkop ae Datni unun dakon oman aneŋ do mukwa sogok amini egipneŋ do manjiŋ nipgut. Bisap mudok mudogi mini Yesu Kristo dakon tilimni ae tapmim madepni taŋ imdisak. Unun asi.

⁷ Koni. Unun gikwem gat kisi apdisak. Abiŋakwan amin morap kisi da dabil da kokdaŋ. Amin morap Yesu sugawit unun kisi da kokdaŋ. Anakwa amin morap miktimon ekwaŋ kisi da unun do nandaŋek kunam bupmiyo madepsi akdaŋ. Asi, yo morap unun altaŋ mudokdaŋ. Unun asi.

⁸ Amin Tagi Piŋkop Tapmim Ami, abisok egisak, ae kalipsigwan egipgut, ae don apdisak, unun da yaŋ yosok, “Nak Wasok Wasoksi ae Mibisi egisat.”

Jon da Kristo kagit

⁹ Nak Jon, ji dakon notji. Nin Yesu dakon amin kabi, ae Piŋkop da Amin Kila Asak unun da kagagwan kaloni ekwamaŋ, do but yaworon da jigi ae tepmiyo kaloni pamaŋ. Paŋek kisin da dima alek taŋek tebai akgamaŋ. Nak Piŋkop dakon gen yaŋ tenŋeŋaŋek, “Nak Yesu nandaŋ gadaŋ imisat” yaŋ yagim, do aŋek nak abidaŋ tap binap miktim tim Patmos unudon nepgwit da egisat. ¹⁰ Amin Tagi dakon gildatni Sondakon, Telagi Wup da butnokon pigi madepsi tugagit. Anakwan manjinokon nandaŋapbo amin kindu gen madepsi yaŋ tidaneŋ kweŋ da yaŋ yagit. ¹¹ Unun amin da yaŋ yagit, “Yo morap pindakdal unun papiakon mandaŋ yopbi paŋmuwukbi 7 kabi do kini. Mandaŋ yopbi paŋmuwukbi Epesas kokup papmon ekwaŋ,

ae Smena, ae Pegamum, ae Taitaira, ae Sadis, ae Piladelpia ae Laodisia do kini.”

¹² Yanban nak gen nayigit amin unun kok do tobigim. Tobilek tentenji tamo gol ban wasanji 7 kabi pindakgim.

¹³ Unun da binapmon
 “amin dakon monji yombem kinda”
 akban kagim. Unun imal dubakni paban pigi kandapni kisi witjigit. Anek nap kinda gol ban wasanji nan pibirikon angwasinek wamgut. ¹⁴ Busunji ae busun dangwani unun kwakwagisi, sipsip dakon dangwan ae gik sitnan yombem. Ae dabilni kindap tebaisi sosen unun yombem. ¹⁵ Kandapni unun tentenji ain kinda mani bras kindapmon sosen unun yombem. Ae tekni nandagim unun pakbi madepsi pokgon unun dakon wiwik yombem. ¹⁶ Kisiri amin tet da gik 7 kabi timikgit. Ae emat agak siba geni teri teri ae geni tepmisi unun gen kaganigwan da pawin tagit. Gildat da tebaisi wisisak unudenj tomno dabilni madepsi tentenagit.

¹⁷ Nak unun kanek kandapnikon manj pagek amin kimakbi da yan pakgim. Pagapbo kisitni amin tet da kwenokon witjinek yan yagit, “Dima pasolgi. Nak Wasok Wasoksi ae Mibisi egisat.

¹⁸ Nak Egip Egip Egisat Amin. Nak kimakgim, mani koki, nak egip egip dagok dagogi mini egi anan kisat. Kimot dakon yoma wital, ae amin kili kimakgwit unun dakon kokup dakon yoma wital kisitnokon ton. ¹⁹ Do gak yo pindakdal unun dakon geni mandaki. Yo abisok ton, ae yo don

1:13: Dan 7.13; 10.5 **1:14:** Esi 43.2; Dan 7.9; 10.6; PA 2.18; 19.12 **1:16:** Ibr 4.12; PA 2.12; 19.15 **1:17:** Ais 44.6; 48.12; PA 2.8; 22.13

noman tokdan, unun do mandaki. ²⁰ Gik 7 kabi kisitno amin tet do tanba pindal, ae tenjenji tamo gol ban wasanbi 7 kabi yan pindal, unun dakon mibili pasili tosok. Mibili unun yan: gik 7 kabi unun panmuwukbi 7 kabi dakon aneloni. Anakwa tenjenji tamo 7 kabi unun panmuwukbi 7 kabi.”

2

Epesas panmuwukbi do gen yipgut

¹ Unun da sanbenek yan yagit, “Gak panmuwukbi Epesas kokup papmon ekwan unun dakon aneloni do gen yan mandaki:

Nak gik 7 kabi kisitno amin tet da timigek tenjenji tamo gol ban wasanbi 7 kabi da binapmon agisat. Agek gen on yipbo gagon obisak. ² Anpak asal ae pi teban asal unun kili nandan mudagam. Gak tebaisi agek amin anpakni yokwi do dima galak tan yomisal. Diwari da yan gayiwit, ‘Ninyo kisi yabekbi’, mani unun yabekbi dima yan unun gaga kili geni kokwinigek top amin yan pindakgil. ³ Amin da gandaba mano abidosol do yo yokwisi anjaman. Mani tebaisi agek jigi unun imegek kuraktok dima asal.

⁴ Mani nak gak gat gen ton. Nandan gadat kaluk agil bisapmon nak do but dasi galak tan namgul, mani abisok yan dima asal. ⁵ Kalip tagisi egipgul do nandaki. Gak kili mal. Do anpak kalip agil unun do aego nandanek but tobil anek anpak kalip agil unuden abi. Yan dima abi kan, abin lamgo unun si gwayeken. ⁶ Mani anpakgo tagisi kinda unun yan: Nikolas dakon

amin kabi dakon anpak do nandaba yokwi tok asal. Nagayo kisi unun amin dakon anpak do nandako yokwi toso.

⁷ Amin mirakni ton da Telagi Wup da panmuwukbi do gen yosok unun pakyanji nandani. Amin kinda emaron teban tosak kan, nak da yan dagan iminapbo egip egip kindap walon jap pan nosak. Kindap unun Paradais kon Pinjop da pigaga toso.”

Smena panmuwukbi do gen yipgut

⁸ Unun da sanbenek yan yagit, “Gak panmuwukbi Smena ekwan unun dakon aneloni do gen yan mandaki:

Nak wasok wasoksi ae mibisi egisat. Nak kimakgim da aeno kalugi egisat. Gen on yipbo gagon obisak. ⁹ Gagon jigi ae tepmiyo morapmi noman tan gama, ae yogo minisi da egisal, unun nandan gamisat. Mani yogo morapmisi. Amin diwari da gen yokwi yan gama unun nandisat. Unun amin da iyi do nin Juda amin yan yon, mani unun Juda amin dima, unun Sunduk dakon amin kabi. ¹⁰ Donjok tepmi pakdisal. Mani unun do pasol pasol dima abi. Ji panjewa do Sunduk da ji da binapmon amin diwari ban dam tebanon yopdisak. Yan aban jigi ae tepmiyo gildat 10 da aripmon pakdan. Dikba kimotni do yoni kan, tebaisi agek nandan gadatji dima wital kisak. Anakwa egip egip dakon pelit tilimi ton daben.

2:7: WW 2.9; PA 22.2,19
2Ti 4.8; Jem 1.12

2:9: 2Ko 11.14-15; PA 3.9

2:10:

¹¹ Amin mirakni toŋ da Telagi Wup da paŋmuwukbi do gen yosok uŋun pakyaŋsi nandani. Amin kinda emaron teban tosak kaŋ, uŋun amin kimot da ae kinda gat aripmi dima aŋupbal asak.”

Pegamum paŋmuwukbi do gen yipgut

¹² Uŋun da gen saŋbeŋek yagit, “Gak paŋmuwukbi Pegamum kokup papmon ekwaŋ uŋun dakon aŋeloni do gen yaŋ mandaki:

Nak emat agak siba geni teri teri ae geni tepmisi uŋun abidosot. Gen on yipbo gagon obisak. ¹³ Kokup egisal uŋudon Sunduk dakon kila amin madep yityit tamoni uŋudon tosoŋ uŋun nandisat. Mani nak dakon man abidaŋ kimokdol. Antipas, nak dakon gen dakon yaŋ teŋteŋok amin tagisi kinda, uŋun Sunduk da egisak kokupmon aŋakba kimakgit. Yaŋ aŋakwa gak uŋun bisapmon nak do wasip dima yagil.

¹⁴ Mani nak gak gat gen toŋ. Gagon amin di da Balam dakon aŋpak abidaŋ kimokgoŋ. Balam dakon aŋpak uŋun yaŋ. Kalip Balam da Balak Israel amin paŋkewal dakon mibili iyin dekgit. Iyin dekban Balak da Israel amin paŋkewalban yokwi aŋek kokup kidat do bit kilapyo mukwa sowit uŋun nawit. Ae yumabi kisi awit.

¹⁵ Uŋudeŋ gin amin di gagon ekwaŋ uŋun Nikolas dakon amin kabi dakon geni guramikgaŋ.

¹⁶ Gak but tobiŋ abi. Yaŋ dima abi kaŋ, nak kili uŋunjak gagon obineŋ gen kaganokon emat agak siba tosoŋ uŋun naŋ uŋun aminon emat akdisat.

17 Amin mirakni tonj da Telagi Wup da panmuwukbi do gen yosok unun pakyanji nandani. Amin kinda emaron teban tosak kan, nak da mana di abisok pasili tonj unun iben. Ae tip kwakwagi kinda iben. Unun tipmon man kalugi kinda mandabi da tosak. Unun man amin kinda da dima nandisak. Amin tip abidosak unun amin dagin nandakdisak.”

Taitaira panmuwukbi do gen yipgut

18 Unun da gen sanbenek yagit, “Gak panmuwukbi Taitaira kokup papmon ekwan unun dakon anjelo do gen yan mandaki:

Nak Pinjop dakon Monji. Dabilno unun kindap tepmisi sosok unun yombem, ae kandapno tenjenosok unun ain kinda mani bras suganba kwakwagisi an unun yombem. Gen on yipbo gagon obisak. 19 Anpak morap asal unun nandan mudosot. Gak amin do but dasi galak tan yomisal, ae nak nandan gadan namisal, ae amin diwari panpulugok do pi asal. Nak nandisat, pi mibiltok agil unun yapmanek abisok pi madepsi asal.

20 Mani nak gak gat gen tonj. Gak Jesebel yipbi gak gat ekwamal. Minjat unun da nak kombi amin kinda yan yosok, mani pi monjino top pankewalek yumabi anpak, ae jap kokup kidat do paret abi unun noni do yoyin dekdak. 21 But tobil asak do nandanek bikbik imisat. Mani but tobil anek yumabi anpakni yipman det do dima nandisak. 22 Do unun minjat sot kinda

2:17: TP 16.4,14-15,33-34; Ais 62.2; Jn 6.48-50 **2:18:** PA 1.14-15

2:20: 1KA 16.31; 2KA 9.22

ibo tepmi madepsi pakdisak. Ae amin morap unun minat gat yumabi awit but tobil anek unun minat dakon anpakni dima yipman mudoni kan, ununyo kisi jigi ae tepmiyo madepsi yomdisat. ²³ Ae monji gwayoni kisi dapbo kimotni. Yan anapbo panmuwukbi kisi morap da nak da amin but ae nandak nandakyo pindagek ji kalon kalon anpak ani da aripmon tomni damdisat yan nandan namdan. ²⁴ Mani panmuwukbi diwaritaitaira ekwan ji minat unun dakon gen dima yolgan, ae 'Sunduk dakon geni pasili' yan yon, unun dakon mibili nandak do pini dima awit. Yan dayisat, jigi kinda gat dima daben. ²⁵ Mani yo morap timikgan unun tebaisi timigakwa wigi nak da opben dakon bisap asak.

²⁶ Emaron teban tajak geno guramigakwan wigi bisap madep apjak amin unun yan mudan ibo miktim morap kila akdisak.

²⁷ 'Kila amin pini tapmimi tonji anek ain win kirin nan uwalni pudan monin monin akdisak, amin da miktim kwoba pudan monin monin an unun da tilagon akdisak.'

Datno da yan mudan namgut, unun da tilak unun amin do yan mudan iben. ²⁸ Ae wisawisa do gik wisak unun kisi iben. ²⁹ Amin mirakni ton da Telagi Wup da panmuwukbi do gen yosok unun pakyanji nandani."

3

Sadis panmuwukbi do gen yipgut

2:23: Kap 7.9; Jer 17.10; PA 20.12-13
Kap 2.8-9

2:25: PA 3.11

2:26:

2:28: PA 22.16

¹ Unjun da sanjenek yan yagit, “Gak panmuwukbi Sadis kokup papmon ekwan unjun dakon anjloni do gen yan mandaki:

Nak Pinjop dakon wup 7 kabi timikdat, ae gik 7 kabi kisi timikdat. Gen on yipbo gagon obisak. Anpak morap asal unjun kisi nandan mudosot. Amin da gak do yan yon, ‘Sadis panmuwukbi kabi unjun egip egipmi tonji.’ Mani kili kimakgil.
² Dipmingo yopbi kit! Anpakgo diwari dima kimakgwit unjun panjeban abi. Nido anpakgo kinda Pinjopno da dabilon kilegisi yan kinda dimasi kat.
³ Gen bami kalip nandanek abidagil, unjun do aego nandabi. Nandanek guramigek but tobil abi. Dipmin dima yipbi kisak kan, kabo noknok da tilagon apdisat. Abinapbo gagon opdisat dakon bisap dima nandakdisal.

⁴ Mani amin kabisok kinda Sadis ekwan unjun imalni dakon kila anjek garak dima awit. Unjun amin kabi dakon anpakni kilegisi, do imal kwakwagi paba nak gat tagi agipnenj.

⁵ Amin kinda emaron teban tosak kan, unjun do kisi imal kwakwagi pan ibenj. Ae egip egip papiakon mani dima wiririkgenj. Datno da inamon ae anjloni da inamon mani yan tenjenokenj.
⁶ Amin mirakni tonj da Telagi Wup da panmuwukbi do gen yosok unjun pakyanji nandani.”

Piladelpia panmuwukbi do gen yipgut

3:1: PA 1.4,16 **3:3:** Mt 24.43-44; 1Tes 5.2; PA 2.5; 16.15 **3:4:** Jut 23 **3:5:** TP 32.32-33; Mt 10.32; Lk 12.8

⁷ Unjun da sanbenek yan yagit, “Gak panmuwukbi Piladelpia kokup papmon ekwan dakon anjloni do gen yan mandaki:

Nak telagisi, ae anpak bamisi dakon ami. Nak da Dewit dakon yoma wital abidosot. Nak da yoma witaldat, amin kinda da aripmi dima sop sopmi. Ae nak da yoma sopmandat, amin kinda da aripmi dima witali. Gen on yipbo gagon obisak. ⁸ Anpak morap asal unjun kili nandan mudagam. Koki! Injamgokon yoma kinda witalbo pisosok. Ae amin kinda da aripmi dima sopjak. Nak nandisat, tapmimgo madep dima, mani nak dakon gen guramigek nak dakon man do wasip dima yagil. ⁹ Sunduk dakon amin kabi unjun da iyi do nin Juda amin yan yon, mani unjun Pin kop dakon amin dima, unjun top amin. Nak da unjun amin yabekgo abin gak da kandap mibilon nwanben anek nak da ji but dasi galak tan damisat yansi nandani. ¹⁰ Nak dakon gen guramigek jigi altan gamgwit bisapmon butgo yawori tanakwan tebaisi akgil. Yan agil do jigi madep miktimi miktimi amin pankewal do noman tokdisak bisapmon kilago anapbo jigi unjun dima altan gamjak. ¹¹ Gagon tepmisi apdisat. Yo abidosol unjun tebaisi abidoki. Amin kinda da tomnigo unjun di gwayenban.

¹² Amin kinda emaron teban tosak kan, nak da gwak yan moko agek Pin kopno dakon telagi yut anteban asak. Anek Pin kop dakon yut yipmanek aeni wanga dima pigisak. Unjun

3:7: Ais 22.22 **3:8:** 1Ko 16.9 **3:9:** Ais 45.14; 49.23; 60.14; PA 2.9 **3:10:** Lk 21.19; 2Ti 2.12 **3:12:** Ais 62.2; 65.15; PA 14.1; 21.2

aminon Pinjkopno dakon man, ae Pinjkopno dakon kokup pap dakon man mandaken. Kokup pap unun Jerusalem kalugi, unun Kwen Kokup yipmanjek Pinjkopnokon da pikdisak. Ae naga dakon mano kalugi kisi unun aminon mandakdisat. ¹³ Amin mirakni tonj da Telagi Wup da panmuwukbi do gen yosok unun pakyanjsi nandani.”

Laodisia panmuwukbi do gen yipgut

¹⁴ Unun da sanjenjek yan jagit, “Gak panmuwukbi Laodisia kokup papmon ekwan unun dakon aneloni do gen yan mandaki:

Nak Pinjkop dakon geni gat ae yan teban tok geni gat do gen unun asisi yan yogok amin. Nak Pinjkop dakon gen bamisi yan tenjenok amin. Bisapmi bisapmi geni bamisi gin yan tenjenosot. Pinjkop da yo morap wasagit dakon mibilisi nak da gen on yipbo gagon obisak. ¹⁵ Anpak morap asal unun kisi nandan mudosot. Nak nandisat, gak mirimi dima, ae tedepmi dima. Gak da mirimi bo ae tedepmi egipbi do nandisat.

¹⁶ Mani dima. Gak tedepmi yangok egisal. Gak tedepmisi dima ae mirimisi yo dima. Yan do anjek gen kaganokon da gak wanditdisat. ¹⁷ Gak ‘Monejno morapmi ae yo kabino morapmi tonj. Yo kinda do wadak wadak dima asat’ yan yosol. Mani dima. Amin da bupmisi nandan gamni da tilagon yokwisi egisal. Gak yogo minisi da egisal, ae dabilgo mini, ae molan molan agisal. Anjek gaga dima nandabi pisosok. ¹⁸ Yan do anjek nawa gen on gamisat. Nak dakon golno

kindapmon sonba gwaljigi minisi an unun gol ban yubi kan, monenjo morapmisi tan gamdan. Ae giptingo wam do imal kwakwagi ban yubi kan, amin da gandaba molan dima agipbi, ae mayagigo mini. Ae dabil marasin di yumanek dabilgokon yopbi kan, tagisi sintokdisal. ¹⁹ But dasi galak tan yomisat amin unun tebai yoyinek anpakni panakilek ani do jigi yomisat. Do anpakgo panakilek ak do pi tebai anek but tobil abi.

²⁰ Nandaki! Nak yomakon agek yoma domon tidanek yan yosot: Nak yutnon tagi wiken? Amin kinda tekno nandanek yoma witaljak kan, nak wigiko unun gat egek jap nonden.

²¹ Amin kinda emaron teban tosak kan, unun amin do yan dagan ibo kila amin madep yityit tamonokon nak gat kisi yitden. Kalip nak da emaron teban tanek Datno gat kisi kila amin madep yityit tamonikon yikgin unuden yitden. ²² Amin mirakni ton da Telagi Wup da panmuwukbi do gen yosok unun pakyanji nandani.”

Sipsip Monin da Kwen Kokupmon Papia Kinda Witalakwan Miktin Aminon Yo Yokwisi Noman Tokdan

(Kilapmi 4–11)

4

Kwen Kokupmon Pin kop gawak iman

¹ Uņun da kwenon aeno kaņapbo Kwen Kokupmon yoma kinda wiđdal kigit da taņban kagim. Kaņapbo amin uņun kalip nak do kweņ da yaņ tebaisi yaņ tidaneķ yaņ namgut uņun da yaņ yagit, “Idon wiņaki yo morap don altokdaņ goliķo.”

² Nayiņban uņudon giņ Telagi Wup da butnokon piģi madepsi tugagit. Aņakwan Kwen Kokup kila amin madep yityit tamo kinda taņban kagim. Uņun tamokon amin kinda yikban kagim. ³ Uņun amin tip jaspa ae tip gami konilian da yaņ tenņeņagit. Kilap baņ kinda da kila amin madep yityit tamo uņun aņgwasigit. Kilap baņ kildani uņun tip kalikaligi emeral yaņ. ⁴ Kila amin madep yityit tamo 24 kabi da kila amin madep yityit tamo uņun aņgwasineķ taņba pindakgiņ. Uņun tamokon kila amin 24 kabi da yikgwit.* Uņun kila amin imalni kwakwagi baņ pawit, ae busuņikon pelit kildani toņ gol baņ wasaņbi baņ pawit. ⁵ Kila amin madep yityit tamokon da mal dakon tenņeņi da yangwit. Aņakwa nandaņapbo wuwik madepsi noman taņakwa kiririņ agit. Kila amin madep yityit tamo noman da kaliņ 7 kabi sowit. Kaliņ uņun Piņkop dakon wupni 7 kabi. ⁶ Kila amin madep yityit tamo noman da yo kinda tagit, uņun tap idap daman glas baņ wasaņbi yombem, ae wagil kwakwagisi.

Yo 4 kabi egip egipmi toņ uņun kila amin madep yityit tamo dakon ileņi 4 kabikon akgwit. Yo 4 kabi uņun burikon ae manjikon kisi dabil morapmi da giptimi kisi ilimikgwit. ⁷ Yo egip egipmi toņ kinda

4:1: PA 1.1,10 **4:2:** Ais 6.1 **4:3:** Esi 1.28 **4:4:** PA 3.18

* **4:4:** Uņun kila amin uņun aņelo man madepni toņ kabi kinda do yosok. **4:5:** Esi 1.13; Sek 4.2; PA 1.4; 8.5; 11.19; 16.18 **4:6:** Esi 1.5-10,22; 10.14

uñun laion yombem. Ae kinda uñun bulmakau wili yombem. Ae kinda uñun tomno dabilni amin dakon yombem. Ae kinda uñun singin madep kwen agegisak yombem. ⁸ Yo 4 kabi egip egipmi ton kalon kalon uñun kisi piri 6 kabi tan yomin yomin awit. Anakwa giptimi kalon dabil morapmi da ilimikgwit. Ae piri da mibilgwan kisi tawit. Gildari ae kalbi kisi ak nandari mini yan yon,
 “Telagi, telagi, telagi.

Amin Tagi Pin^{kop} Tapmim Ami kalipsi egipgut,
 ae abisok egisak,
 ae don apdisak,
 uñun telagisi” yan yon.

⁹ Yo egip egipmi ton kabi uñun da Amin uñun kila amin madep yityit tamonikon yikdak ae egip egip dagok dagogi mini egisak uñun do kisik kisik madepsi anek mani awigek ya yan iyan. Bisapmi bisapmi yo 4 kabi egip egipmi ton uñun yan anakwa ¹⁰ kila amin 24 kabi da Amin uñun kila amin madep yityit tamokon yikdak uñun da buron man pokgon. Man pagek egip egip dagok dagogi mini egisak Amin uñun gawak iman. Ae pelitni kildani ton gol ban wasanbi uñun kila amin madep yityit tamo tosok unudon noman ilik yopmanek kap yan yon,

¹¹ “Amin Tagi Pin^{kop}nin,
 gak da yo morap galaktokgokon wasagil da abisok ton.

Yan agil do minat amin morap kisi da gak do kisik kisik madepsi anek mango awigini,
 ae tapmimgo madepsi da yon^{gangwan} pin^{bi} egipni kan tagisi.”

5

Jon da papia kinda kili sogwit kagit

¹ Amin unun kila amin madep yityit tamokon yikgit unun kisitni amin tet do papia gironjiki kinda tanban kagim. Papia unun teri teri kildani ton, ae kendol pakbi ban kosiri 7 kabi anteban abi.

² Ae anelo tapmimi tonji kinda kanapbo gen papmon da yan tidanjek yan yagit, “Namin amin kilegisi kinda dasi kendol pakbi ban panjeban abi pakdegek papia tagi witaljak?” ³ Mani amin Kwen Kokup ekwan, bo ae miktimon ekwan, bo ae miktin da mibiligwan ekwan kinda da papia unun aripmi dima witaljak bo ae aripmi dima kosak. ⁴ Nak papia unun amin kinda da aripmi dimasi witaljak bo ae kosak yan kanek kunam madepsi sanbek sanbek morapmi takgim. ⁵ Yan anapbo kila amin kabikon da kila amin kinda da yan nayigit, “Gak kunam dima takgi. Koki! On Laion Juda amin kabikon altagit, unun Dewit dakon babinikon gugit unun da don noman tan wigit. On Laion emaron teban tagit. Yan agit do unun da papia kendol pakbi ban kosiri 7 kabi panjeban abi unun pakdegek tagi witaljak.”

Jon da Sipsip Monij kagit

⁶ Yan nayinjakwan Sipsip Monij kinda akban kagim. Unun paret ak do si anakba kimakgit yombem. Unun kila amin madep yityit tamo da binapmon agakwan yo 4 kabi egip egipmi ton gat ae kila amin gat da angwasiwit. Sipsip Monij unun jomni 7 kabi, ae dabilni 7 kabi. Dabilni

5:1: Ais 29.11; Esi 2.9-10 **5:5:** WW 49.9; Ais 11.1,10; PA 22.16

5:6: Sek 4.10; Jn 1.36; PA 13.8

uñun Piñkop dakon wupni 7 kabi. Uñun Piñkop da yabekban miktimi miktimi kin mudawit. ⁷ Kili Sipsip Moniñ da kila amin madep yityit tamokon kin Amin yikgit da kisiri amin tet do papia tagit uñun abidagit. ⁸ Papia uñun abidanakwan yo 4 kabi egip egipmi ton, ae kila amin 24 kabi gat da Sipsip Moniñ da kapmatjok man pakgwit. Kisisi kalon kalon gita moniñni gat ae gol idapni gat timik timik awit. Gol idapmon yo kibani tagisi tugawit, uñun Piñkop dakon minat amin kabayo dakon bisitni.

⁹ Yan anek kap kalugisi kinda yan yawit,
 “Gak da papia gironjiki abidanek kendol pakbi
 ban panṭeban abi uñun aripmi tagi pakdekgi.
 Nido gikba kimagek yawigo nan minat aminyo
 Piñkop do im do anek yuman nagil.
 Asi, amin mibili mibili ekwan,
 ae geni mibili mibili,
 ae giptimni mibili mibili,
 ae miktimi miktimi ekwan kisi yuman nagil.
¹⁰ Yuman nanek amin kila ani do manjin yopgul,
 ae nin dakon Piñkop dakon oman ani do
 mukwa sogok amini manjin yopgul.
 Uñun da kila amin madep egek miktimon
 amin kilani akdan.”

Sipsip Moniñ dakon man anksiwit

¹¹ Kili aeno kan egapbo anelo morapmisi dakon geni nandagim. Uñun anelo dakon tilakni milion morapmisi ae tausen morapmisi da arip. Uñun anelo kila amin madep yityit tamo ae yo egip

egipmi tonj ae kila amin kabi ban panjwasinejek akg-wit. ¹² Yanj tidanejek kap kinda yanj yawit,
 “Sipsip Moninj on kalip anjakba kimakgit.

Unjun da man madep gat,
 ae yo tagisisi morap gat,
 ae nandak nandak tagisi gat,
 ae tapmimi wukwisi unjun kisi tagi timitjak.
 Amin morap kisi da mani anenagek kisik kisik
 anj iminejek ya yanj iyini kan unjun kilegisi.”

¹³ Ae yo morap Pinjkop da wasagit unjun dakon
 geni kisi nandagim. Yo morap Kwen Kokup ek-
 wan, ae miktimon ekwan, ae miktim kagagwan ek-
 wan, ae tap kaga ekwan kisi dakon geni nandagim.
 Unjun da yanj yawit,

“Amin unjun kila amin madep yityit tamonikon
 yikdak,
 ae Sipsip Moninj gat kisi,
 nin jil dakon tilim gat ae tapmim gat pindagek
 kisik kisik anjek dagok dagogi mini man
 madep damamanj.”

¹⁴ Anjakwa yo 4 kabi egip egipmi tonj unjun da yanj
 yawit, “Unjun asi.” Yanj yanjakwa kila amin kabi da
 manj pagek gawak yomgwit.

6

*Sipsip Moninj da kendol ban papia sonj anteban
 awit unjun pakdekgit*

¹ Nak kanapbo Sipsip Moninj da papia gironjikbi
 abidanjek kendol pakbi ban kosiri 7 kabi panjteban
 abi unjun mibiltok nani pakdekgit. Pakdegakwan
 yo egip egipmi tonj 4 kabikon da kinda gen yagit.

Geni unun kiririn da yan yagit, “Gak op.” ² Aeno kanek os kwakwagi kinda kagim. Unun da kwenon amin kinda obipni abidanek yikgit. Unun amin do kila amin madep dakon pelit kinda imgwit. Iba emaron teban tagit da tilagon kigit. Kinjek emat morapmi sigin anek teban token yanon da nandanek kigit.

³ Sipsip Monin da kendol pakbi ban papia anteban abi 2 unun pakdekgit. Pakdegakwan yo egip egipmi ton 2 unun da yagit, “Gak op.”

⁴ Yanakwan os gami kinda apban kagim. Unun da kwenon amin yikgit unun do tapmim ibi. Unun tapmim unun on miktimon yawori tosok unun pandagosak dakon tapmim. Pandaganban amin da notni dapman dapman anek kimotdan. Unun pi asak do emat agak siba madepsi kinda imgwit.

⁵ Kili ae Sipsip Monin da kendol pakbi ban papia anteban abi 3 unun pakdekgit. Pakdegakwan yo egip egipmi ton 3 unun da yagit, “Gak op.” Yanakwan os pilisi kinda kagim. Unun da kwenon amin kinda yikgit, unun jap kokwin agak yo kinda kisirikon abidagit. ⁶ Anakwan amin dakon tek yombem kinda nandanapbo yo egip egipmi ton 4 kabikon da yan yagit, “Amin kinda gildat daman kinda dakon pi asak dakon tomni timitjak unun wit yigi moninisok kinda gin abidosak, bo bali kwoba kapbi gin timitjak. Mani gak olip nelak gat ae wain gat dima pantasik abi.”

⁷ Sipsip Monin da kendol pakbi ban papia anteban abi 4 unun pakdekgit. Pakdegakwan nandanapbo yo egip egipmi ton 4 da yan yagit, “Gak

op.” ⁸ Yanjakwan os kilonkiloni kinda kagim. Unun da kwenon amin kinda yikgit unun mani Kimot. Amin Kili Kimakgwit Dakon Kokupni unun kapmatjok da yolgıt. Amin miktimi miktimi ekwan kokwin 4 kabi anek kabi kinda dapbal kimotni do tapmim yobi. Diwari emat agak siba ban dapbal kimotni, ae diwari jap do madepsi anek kimotni, ae diwari sot yokwisi da timitjak, ae diwari jon bit kilapyo da dapman noni.

⁹ Sipsip Monin da kendol pakbi ban papia anteban abi 5 unun pakdekgıt. Pakdegakwan amin kimakgwit dakon wupni alta da mibilgwan pindakgım. Kalip unun amin da Pinkop dakon gen tebaisi abidanek unun dakon yan tenenok anakwa uwal da dapba kimakgwit. ¹⁰ Amin wup unun da tebaisi yan tidanek yan yawıt, “Amin Tagi Tapmim Ami, gak telagisi egisal, ae anpakgo wagil bamisi gin. Nin bisap nianđasi gak do jomjom anapno miktım amin gen pikon yopmanek yawinin dakon kobogi yobi?” ¹¹ Yanba unun amin do paba pigik dubagi kwakwagisi kalon kalon yominjek yan yoyıwit, “Ji jomjom pisipmisok ani. Uwal da oman amin pi isalji gat, ae notji gat dapdan. Ji dikba kimakgwit, yan gin dapba kimotdan. Amin nian da dapdan unun Pinkop da kili manjigit. Uwal da unun kisisi dapman mudanakwa don Pinkop da yawisi dakon kobogi yomdisak.”

¹² Sipsip Monin da kendol pakbi 6 papia anteban awıt unun pakdekgıt. Pakdegakwan miktım wudip madepsi agıt. Anakwan gildat dabil yik

garan yombem pilisi agit, ae kanek gımanisi yawi yombem agit. ¹³ Anjakwan gik kundukon ton miktimon mawit. Gik mawit unun pik kindap dakon sopmi dima pek tanakwa mirim da pisonakwa mon unun da tilak mawit. ¹⁴ Anakwa papia gironik yopmangaman, unun da tilagon kundu si kin pasilgit. Anjakwan kabap gat ae tap binap miktım tim ton unun tamoni yopman degek duwalik kiwit. ¹⁵ Anakwa miktım dakon kila amin madep gat, ae amin man madepni ton gat, ae emat amin dakon mibiltok amini gat, ae yoni morapmi amin gat, ae amin tapmimi ton gat, ae oman amin, ae amin morap isal ekwan, unun kisisi pasal kin tip gopbatgwan ae kabapgwan tip madep ton unun da mibiligwan pasil do kiwit. ¹⁶ Anek kabap gat ae tip gat do yan tidanek yawit, “Ji nin da kwenon man witjin niminakwa pasili egipnen. Pasili egapno Amin unun kila amin madep yityit tamonikon yikdak unun dima nindasak, ae Sipsip Monin butjap damani nandanek kobogi yokwi dima nimjak. ¹⁷ Amin do butjap madepsi nandanek kobogi yokwisi yomdamal dakon gildat madep kili unun abik. Namın amin dasi tapmimni unun abin yipmanek tagi egipjak?”

7

Israel amin 144 tausen da Pinjok dakon tilak abidawit

¹ Unun da kwenon anelo 4 kabi miktım dakon kodigi 4 kabikon akba pindakgim. Mirim da

6:13: Ais 34.4 **6:14:** PA 16.20 **6:15:** Ais 2.10,19,21 **6:16:** Lk 23.30 **6:17:** Jol 2.11; Mal 3.2 **7:1:** Jer 49.36; Dan 7.2

miktım gat ae tap gat ae kindap gat dima pisoni yan do mirim 4 kabi unun tebaisi timikgwit. ² Yan anakwa anelo kinda gildat wisak tetgin da apban kagim. Unun da Pinjkop egip egipmi ton dakon tilak aminon yop do yo kinda abidanek apgut. Abinek anelo 4 kabi Pinjkop da miktım gat tap gat panjasik ani do tapmim yomgut unun do madepsi yan tidagit. ³ Yan tidanek yan yagit, “Ji miktım ae tap ae kindap tepmisi panjasik ak do dima nandani. Mibiltok Pinjkopnin dakon tilak pi monjini da inamon yopdaman. Yan anapno don yo morap tagi panjasik ani.” ⁴ Ae nandanapbo amin tilak timikgwit dakon tilak yanba nandagim. Israel amin kabi morap da binapmon amin 144 tausen da tilak unun timikgwit.

⁵ Juda amin kabikon amin 12 tausen da timikgwit.

Ae Ruben da kabikon 12 tausen

ae Gat da kabikon 12 tausen

⁶ ae Ase da kabikon 12 tausen

ae Naptali da kabikon 12 tausen

ae Manase da kabikon 12 tausen

⁷ ae Simeon da kabikon 12 tausen

ae Liwai da kabikon 12 tausen

ae Isaka da kabikon 12 tausen

⁸ ae Sebulan da kabikon 12 tausen

ae Josep da kabikon 12 tausen

ae Benjamin da kabikon 12 tausen.

Unun amin da Pinjkop dakon tilak timikgwit.

Mijat amin morapmi da Pinjkop gawak imgwit

⁹ Ae unun da kwenon amin morapmisi pindakgim, unun manjiri mini. Amin unun amin kabi kabi egi egi an unun morap kisi dakon. Ae

miktım morap kisi, ae giptım mibılı mibılı, ae gen mibılı mibılı unun kisi kila amin madep yityit tamo, ae Sipsip Monji da inamon akgwit. Unun ilikba pigik kwakwagisi ae dubagi ban pawit. Ae kisirikon jopban tam ban timikgwit. ¹⁰ Unun amin kabi madep tebaisi yan tidanek yan yawit,

“Pinjopnin kila amin madep yityit tamonikon yikdak, ae Sipsip Moniñ kisi unun dagin nin yokwikon ban timikbal tagisi ekwaman.”

¹¹ Anakwa anelo morap kila amin madep yityit tamo, ae kila amin, ae yo 4 kabi egip egipmi ton unun panjwasinjek akgwit. Agek kila amin madep yityit tamo kanek man pagek tomno dabilni miktıngwan yopmanek Pinjop gawak ingwit.

¹² Anjek yan yawit,

“Unun asi! Nin dagok dagogi mini Pinjopnin do ya yan iyinjek kisik kisik madepsi anek man madepni do yan tenjenoneñ.

Dagok dagogi mini nandan kokwini tagisi, ae tapmim madepni tan imdisak. Unun asi!”

Unun amin kabi dakon tepmi kili unun mudosok

¹³ Kila amin kabikon da kinda da yan nayigit, “On amin ilikba pigik dubak kwakwagi payin unun namın? Ae dukwan da aben?”

¹⁴ Yanban iyigim, “Amin tagi, gaga nandisal.”

Yanapbo yan nayigit, “On amin uwal da kisiron jigi tepmiyo madepsi pawit da abisok tagi ekwan. Imalni Sipsip Moniñ dakon yawi ban suganba kwakwagisi awit. ¹⁵ Yan awit do anek Pinjop dakon kila amin madep yityit tamokon noman

akgan. Gildari ae kalbiyo Telagi Yut Madep-nikon egek omani an iman. Pin kop kila amin madep yityit tamokon yikdak, iyi unun gat egek pan kutnosak. ¹⁶ Jap do ae dima akdan, ae pakbi do dima akdan. Gildat da giptimni tebai dima pindatjak, ae yo kinda da giptimikon pindakban tedepmi dima nandakdan. ¹⁷ Nido, Sipsip Monin kila amin madep yityit tamo da binap yikdak, unun da kila amini egipdisak. Anek pakbi egip egipmi ton da dabilikon unudon pan kikdisak. Anakwan Pin kop da dabil pakbini kisisi wiririkban kunam sanberjek dima tatdan.”

8

Sipsip Monin da kendol pakbi ban pan teban abi 7 unun pakdegit

¹ Sipsip Monin da kendol pakbi 7 papia anteban awit unun pakdegit. Pakdegakwan Kwen Kokup-mon wayin minisi tagit. Yan tanakwan wigi 30 minut da tilak agit. ² Ae koko anelo 7 kabi Pin kop da inamon akgan unun do kwen 7 yan yoba timikgwit.

³ Anakwa ae anelo kinda alta da kapmatjok pan ki akit. Unun anelo gol idap kinda yo kibani tagisi unudon idawik mukwa kibani tagisi sok do abidagit. Anakwan yo kibani tagisi morapmisi imgwit. Iba Pin kop dakon amin dakon bisit gat timik kakwanjek alta gol ban wasanbi Pin kop dakon kila amin madep yityit tamokon noman tosok, unudon mukwa son imgut. ⁴ Yan anakwan mukwa kibani tagisi gat, ae Pin kop dakon amin

dakon bisitni gat, anjelo da kisiron da Pinjop da injamon wigiwit. ⁵ Anakwa anjelo da kindap al-takon tagit unun abidan mukwa sokso idapgwan yopban tujanba kindap maban miktimon mawit. Miktimon manakwa mal dakon tenjeni da yang-wit. Anakwa nandanapbo wuwik madepsi noman tanakwa kiririn agit, ae miktim wudip agit.

Anjelo 4 kabi da kwenj pisowit

⁶ Anakwan anjelo 7 kabi unun kwenj 7 kabi timikgwit unun pisok do tagap tawit.

⁷ Anjelo mibiltok akgit unun da kwenj ni pisonakwan ais ae kindap ae yawi gat panjokolop abi gat kisi miktimon mawit. On miktim daman ae kindapyo kokwin aba kabi kapbi anakwa miktim kabi kindasogit, ae kindap dakon kabi kindasogit. Ae jon kaluk kalugi kisisi son mudawit.

⁸ Ae anjelo unun da bunon nani kwenj ni pisogit. Anakwan yo kindas kabap madepsi yombem si sonakwan, maba tap kaga pigi magit. Unun tap kokwin aba kabi kapbi anakwa kabi kindas yawi dagagit. ⁹ Ae yo egip egipmi ton tap kagagwan ekwan unun kokwin aba kabi kapbi anakwa kabi kindas si kimakgwit. Ae tap wakga yo kisi kabi kapbi kokwin anakwa tap wakga kabi kindas wagilsi tuwil ki tasik tawit.

¹⁰ Ae anjelo 3 kwenj ni pisogit. Anakwan gik madepsi kindas kalin da yan sonjek kundu yipman abin magit. Unun pakbi madep madep pokgon unun kabi kapbi yan kokwin awiron kabi kindakon magit. Ae pakbi dabilon magit. ¹¹ Gik

uñun dakon mani uñun Yo Isipmi ae Emari Tonj. Uñun abin pakbi kabi kindakon manjakwan pakbi uñun isipmisi agit, do amin morapmisi pakbi uñun nanek kimakgwit.

¹² Ae anelo 4 kweni pisogit. Anjakwan gildat ae kanek ae gikyo uñun kokwin aba kabi kapbi anakwa gildat kabi kindae ae kanek kabi kindae ae gik morap dakon kabi kindae panupbal anjakwan pilin tuk awit. Yan awit do gildari dakon ae kalbi dakon tenjeni tagi dima tenjenawit.

¹³ Uñun da kwenon singin madepsi kindae kwen binap akwan kagim. Singin uñun madepsi yan tidanjek yan yagit, “Bupmisi, bupmisi, bupmi madepsi miktimon ekwan amin. Anelo kapbi kweni pisokdan, anakwa miktimon amin jigi madepsi pakdan.”

9

Anelo 5 kweni pisogit

¹ Anelo 5 uñun kweni pisonjakwan gik kindae kundukon da abin miktimon kili magit kagim. Gapma dubagisi ae kidagi mini uñun dakon yoma wital uñun gik do imgwit. ² Anakwa gik da gapma uñun witalakwan uñun gapmagwan da kindap madepsi sosok dakon mukwa da wigit. Mukwa gapmagwan da wigit uñun da gildat dabil gat ae kundu gat dakon kosit sopmanjakwan pilin tuk agit. ³ Anjakwan pilak pilak da mukwa kagagwan da miktimon mawit. Uñun pilak pilak do skopion dakon tapmim yomgwit. ⁴ Pilak pilak uñun yan

8:12: Esi 32.7; PA 6.12-13 **8:13:** PA 9.12; 11.14 **9:1:** PA 20.1
9:2: WW 19.28; TP 10.12-15; Jol 2.2,10 **9:4:** PA 7.3

yoyiwit, “Ji jon gat, ae yo mibili mibili miktimon kwon gat, ae kindap gat unun dima panupbal ani. Ji amin Pin kop dakon tilakni inamikon mini unun ban gin panupbal ani. ⁵ Ji unun amin tepmi pi madepsi kanek 5 da butgwan tagi yomni, mani dima dapba kimotni.” Tepmi pi yomni unun skopion da amin injin yoba tepmi madepsi pan unun da tilagon yomdan. ⁶ Unun bisapmon amin kimot do kosit wisik akdan, mani kimot dima kokdan. Kimot do tagisi nandakdan, mani sigin egipdan.

⁷ Pilak pilak unun os amin da emat do pan tagap an yombem pindakim. Busunikon pelit gol ban wasanbi yombem da tan yomgwit. Tomno dabilni unun amin dakon yombem. ⁸ Busun dangwani unun dubagisi minat dakon yombem, ae geni unun laion dakon yombem. ⁹ Paba pigik ain yombem ban pibiri witjiwit. Piri unun karis morapmi os da emaron kik do ilik pawilakwa wuwik madepsi noman ton unuden awit. ¹⁰ Paljigi skopion dakon yombem, pakbi emari ton aminon yopban pigini dakon kisikni paljigikon tan yoman. Kanek 5 yan amin tepmi madepsi yomyom dakon tapmim tan yoman. ¹¹ Gapma dubagisi kidagi mini dakon aneloni da kila amin madepni egi yomgut. Ibru genon da unun anelo do Abadon yan yawit. Ae Grik genon da Apolyon yan yawit. Unun gen dakon mibili: Yo Morap Pan tasik Ak Amin.

¹² Jigi mibiltok altogi, kili unun altan mudak. Nandabi. Jigi bamori don noman tokdamal.

Anelo 6 kwejni pisogit

¹³ Anjelo 6 kwenj ni pisonjakwan gen kinda noman tanban nandagim. Alta gol ban wasanji, Pinjop da injamon tosok, unun dakon kodigi 4 kabikon jom 4 kabi tawit unudon da yagit. ¹⁴ Gen unun altagit da anjelo kwen abidagit unun yan iyigit, “Anjelo 4 kabi pakbi madep Yupretiskon panjeban awit da ekwan unun witaldal yopbi kini.” ¹⁵ Yanban anjelo 4 kabi unun kin amin morap miktimon ekwan unun kabi kapbi kokwinigek, kabi kinda si dapba kimotni do witaldal yopgut. Anjelo kabi unun kili noman tawit da pi unun ak do awa ae gildat, kanek, ae bilakyo dogin jomjom awit. ¹⁶ Ae nandanapbo emat amin oskon yikgwit dakon tilakni yawit, unun 200 milion yan. Tilakni nandanapbo yawit. ¹⁷ Unun dipmin yombem kanek os gat ae amin os kwenon yikgwit, unun yan pindakgim: amin unun emat dakon yik imalyo pawit. Paba pigik unun gami, ae pili, ae kilonkilonji ban pawit. Os dakon busunji unun laion dakon busunji yombem. Anakwa os da gen kagagwan da milen asip ae mukwa ae salfa tip si sonjek wawit. ¹⁸ Unun amin kokwin kabi kapbi anek, yo yokwi kapbi unun os da gen kagagwan da altawit da minjat aminyo kabi kinda dapba kimakgwit. ¹⁹ Os unun dakon tapminni gen kagani gat ae paljigi garon tawit. Paljigi unun tunon amin emari ton yombem. Paljigi diwarikon tunon amin dakon busunji ton, do unun ban amin panjupbal awit.

²⁰ Amin diwari unun yo yokwisi kapbi da dima dapba kimakgwit amin but tobil dima awit. Kon gat ae kokup kidat iyi kisit da wasawit gat sigin

gawak yomgwit. Kokup kidat unun gol ae silwa ae ain kinda mani bras ae tip ae kindap ban wasawit, unun dima sin-tonj ae gen dima nandanj ae kosit dima akwan. ²¹ Unun amin da amin diwarì dapba kimakgwit, ae sot mawomyo anek yo tapmimi tonj diwarì pawilgwit, ae yumabi awit, ae amin diwarì dakon yo kabì panjisibiwit. Mani but tobil anek yo unun yop do dima nandawit.

10

Anjelo da papia Jon do iban nagit

¹ Ae kanjapbo anjelo tapmimi tonj kinda Kwen Kokup da pigit. Unun giptimi gikwem nanj wamgut, ae busunji da kwenon kilap ban kinda tagit. Tomno dabilni gildat da yanj tenjenagit. Anjakwan kandap bamotni milenj asip yombem. ² Unun anjelo papia gironjki moninj kinda kisirikon abidagit, ae papia unun witald kwi da tagit. Unun kandapmi amin tetgin do tap kwenon yipgut, anek kandapmi teri kinda miktimon bamagit. ³ Anek laion da madepsi yanj tidonj, unudenj madepsi yanj tidanakwan kiririnj 7 kabì da madepsi yawit. ⁴ Kiririnj 7 kabì yanakwa gen yawit unun mandak do agim, mani Kwen Kokupgan da tek kinda yanj noman tagit, “Kiririnj 7 kabì dakon gen unun nandak nandakgokon gin toni. Dima mandabi.”

⁵ Kanjapbo anjelo tap idapmon ae miktimon bamanj akgit, unun kisiri amin tetni Kwen Kokup gin do anjenakgit. ⁶ Anjenagek gen yanj anjeban agit. Pinjop egip egip dagok dagogi mini egisak, kundu gat ae yo morap kundukon tonj, ae miktim gat ae

yo morap miktimon toŋ, ae tap gat ae yo morap tap kagagwan toŋ unun wasagit Amin da manon gen yaŋ anteban aŋek yaŋ yagit, “Bisap kili unun mudokdisak. Piŋkop ae saŋbeŋek jomjom dima akdisak. ⁷ Aŋelo 7 kweŋni piŋkop da yo ak do yagit da pasili toŋ, unun panjalon aban bami toŋ akdisak. Unun gen kalipsigwan kombi amin pi monjini do yomgut.”

⁸ Aŋelo yaŋ yaŋakwan tek unun Kwen Kokup da aeni noman taŋek nayigit, “Gak kiŋ aŋelo unun tap idapmon ae miktimon bamaŋ akdak da kisiron papia tosok unun abida.” ⁹ Nayiŋban kiŋ aŋelo yaŋ iyigim, “Papia moniŋ unun nak do nam.” Iyiko yaŋ nayigit, “Abidaŋek na. Gen kagagokon kabaŋ dakon pakbini yombem galagini tagisi akdisak, mani but kagagogwan emat akdisak.” ¹⁰ Yaŋakwan papia unun kisirikon naŋ abidaŋek nagim. Naŋek gen kaganokon kabaŋ pakbi yombem galagini tagisi nandagim, mani si naŋ mudaneŋ butnogwan emat aban nandagim.

¹¹ Ae yaŋ nayigit, “Gak aego miŋat amin morapmikon, ae miktim morapmikon, ae amin geni mibili mibili yoŋon, ae kila amin madep morapmikon yo noman tokdaŋ, unun do kombi gen yoki.”

11

Amin bamori da Piŋkop gen yaŋ tenŋagimal

¹ Amin kinda da tilak yopyop kindap kirin kinda namineŋek yaŋ nayigit, “Gak pidaŋek Piŋkop dakon telagi yut gat ae alta gat tilak yopmaŋ. Yaŋ aŋek

amin unun yutgwan Pinjkop gawak iman unun manjiki. ² Mani tamo wanja da tosok unun Amin Nwaktjwari Kabi da egipni do parekbi, do unun tilak dima yipbi. Unun amin kabi da abin Pinjkop dakon telagi kokup pap pabin yopmanjek kila tebaisi anek bamanakwa kanek 42 yan akdisak. ³ Anakwa nak da amin bamori unun geno yan tenjenonjil do tapmim yoben. Amin bamot unun bupmi dakon yik imalyo ban pakdamal. Anek nak dakon gen yan tenjenanakwal gildat 1,260 yan akdisak.”

⁴ Amin bamot unun miktim daman dakon Amin Tagini da inamon olip kindap bamot ae lam bamot akgamal unun mani. ⁵ Uwalni da yo yokwi an yomni kan, kindap gen kaganikon da noman tanek sonba mini an. Asi, amin di unun amin bamot yo yokwi an yomni kan, kosit yanon da si kimotdan. ⁶ Unun amin bamot kundu kosit sopman ibal kombi gen yonjil bisapmon sikak dima moni dakon tapmim tan yoman. Ae pakbi kulabik abal yawi dagoni dakon tapmim kisi tan yoman. Ae miktim aminon wasok mibili mibili abal amin yokwi toni dakon tapmim kisi tan yoman. Yo unuden galaktoknikon tagi anjil.

⁷ Pinjkop dakon gen yan tenjenan anki wasip anakwal, jon kilap yokwisi kinda unun gapma kidagi mini yipman degek kwen wikdisak. Win amin bamot gat emat wamanjek amin bamot pabin yopmanjek dapban kimotdamal. ⁸ Anakwan bumjotni unun kokup pap da kosit oba madepmon tokdamal. Kokup pap unun tilak anek mani Sodom

11:2: Lk 21.24; PA 13.5 **11:4:** Sek 4.3,11-14 **11:5:** 2Sa 22.9; Kap 97.3 **11:6:** TP 7.17-20; 1Sa 4.8; 1KA 17.1 **11:7:** Dan 7.21; PA 12.17; 13.7; 17.8 **11:8:** Lk 13.34

ae Isip yan̄ yoŋ. Uŋun kokup pap uŋudon g̃in kalip Amin Tag̃ini tilak kindapmon an̄akba kimakgit. ⁹ Amin mib̃ili mib̃ili geni mib̃ili mib̃ili yoŋ, ae giptimni mib̃ili mib̃ili, ae mikt̃imi mikt̃imi ekwan̄on da amin morapm̃isi da gildat kap̃bi ae gildat teri kind̃a amin bamot dakon bumjot p̃indatdaŋ. Ae yum p̃indagakwa amin da bumjotni dimasi wayitni do yokdaŋ. ¹⁰ Mikt̃im amin da amin bamot uŋun kili wag̃il kuŋwamal yan̄ p̃indagek, but kwaktok nandaŋek notni do but galak yo yomdaŋ, nido kombi amin bamot uŋun mikt̃im amin tepmi madepsi yomgumal.

¹¹ Mani gildat kap̃bi gat ae gildat teri kind̃a kin̄ mudan̄akwa, Pin̄kop da egip egip mirim yipban amin bamot da butgwan pukwa p̃idaŋ akg̃imal. Agakwal amin bamot p̃indakgwit amin uŋun madepsi pasalgwit. ¹² An̄akwa amin bamot uŋun nandaŋakwal amin kind̃a da Kwen Kokupgwan da tebai yan̄ tidan̄ek yan̄ yoyigit, “Jil idon win̄jil.” Yan̄akwan uwalni p̃indagakwa amin bamot gikwem kagagwan wigek Kwen Kokup wig̃ig̃imal. ¹³ Wugakwal uŋudon g̃in wudip madepsi kind̃a an̄akwan kokup pap dakon timi kind̃a tasik tag̃it. An̄akwan timi 9 kab̃i daŋin tag̃it tawit. Uŋun wudip da amin 7 tausen yan̄ dapban kimakgwit. An̄akwa si egipgwit amin madepsi pasalek Kwen Kokup Pin̄kop dakon man yan̄ an̄kisiwit.

¹⁴ Kili jig̃i madepsi kosiri 2 kili uŋun mudak. Mani nandani, bisap pisipmisok egek jig̃i 3 noman tokdisak.

Anjelo 7 kwenj pisogit

15 Kili anjelo 7 kwenj ni pisogit. Anjakwan nandanapbo Kwen Kokupgwan da madepsi yanj tidanjek yawit, “Pinjkop Amin Taginin gat ae Kristoni gat, unjun bamot miktimi miktimi dakon kila amin madep dagamal. Amin Tagi da kila amin madep dagok dagogi mini egi wugikdisak.”

16 Anjakwan kila amin 24 kabi iyi da kila amin madep yityit tamokon Pinjkop da inamon yikgan, unjun njwakbenj anek tomni dabilni miktimon yopmanjek Pinjkop gawak ingwit. 17 Anek yanj yawit,

“Amin Tagi Pinjkop Tapmim Ami,

gak abisok egisal,

ae kalipsigwan egipgul.

Tapmim madepgo abidanjek kila amin madep pigo wasanjek asal,

do nin ya yanj gayamanj.

18 Pinjkop do kuraktok anj amin unjun Pinjkop do butjap madepsi nandawit,

mani gak da butjap madepsi pakdisal bisap kili unjun noman tosok.

Abisok amin kimakgwit gen pigokon opni dakon bisap.

Abisok pi monjigo do tomni tagisi yomdisal dakon bisap.

Unjun kombi amin, ae gaga dakon minjat amin kabi, ae gak dakon man do pasalek ekwanj amin, unjun amin mani tonj ae mani mini kisi do tomni tagisi yomdisal.

Abisok miñat aminyo pañupbal awit amin,
uñun pañtasik aki dakon bisap.”

¹⁹ Kila amin da yañ mudanakwa, anjelo da Piñkop dakon Telagi Yut Madep Kwen Kokup tosoq uñun witdalgwit. Anakwa Piñkop dakon Sanbek Sanbek Kinam Telagi Yut Madepmon tanban kawit. Mal da dukwan dukwan yamanakwan kiririrñ uñun wuwik madepsi yagit. Anakwan miktim wudip anakwan ais morapmi sikak da yañ mawit.

Sunduk gat amin kabini gat wagisi tasik tawit

(Kilapmi 12–20)

12

Jon da miñat gat ae nugim yokwisi madep gat pindakgit

¹ Kili kundukon tilak ñwakñwarisi kinda noman tagit. Tilak uñun yañ: Miñat kinda gildat dabil nañ imali do wamgut. Anakwan kanek kandapni da mukgwan tagit, ae gik 12 kabi da busuñikon peliri do tan imgwit. ² Miñat uñun monji kwapni ton. Monji altok do anakwan tepmi nandanek madepsi yañ tidagit. ³ Ae kundukon tilak kinda gat noman tagit. Tilak uñun yañ: nugim yokwisi giptimi gami madepsi kinda noman tagit. Uñun nugim yokwisi uñun busuñni 7 kabi. Anakwan jomi 10 yañ busuñikon kwawit. Anakwan kila amin madep pelit 7 kabi da busuñikon tawit.

⁴ Uñun dakon paljigi da kundukon gik morapmi wiririkban miktimon mawit. Uñun gik kokwin

kabi kapbi anek, unun dakon kabi kinda kisisi miktimon mawit.

Nugim yokwisi unun minat unun da monji anjalak do agit unun da inamon akgit. Minat unun da monji anjalanban monji unun si nok do jomjom anek akgit. ⁵ Anakwan minat unun monji wili anjalagit. Unun wili da kila agak dakon ain teban abidanek minat amin morap miktimon ekwan unun kila tebaisi akdisak. Minat monji altanban unudon gin anan kwen Pin kop ae Pin kop da kila amin madep yityit tamo unudon awigiwit. ⁶ Anakwa minat unun pasal kin miktim amini minikon kigit. Unudon Pin kop da tamoni kili anroman agit. Unudon kilani anek jap iminakwa wigi gildat 1,260 yan asak.

⁷ Kili Kwen Kokup emat madepsi kinda noman tagit. Maikel gat anelo kabini gat nugim yokwisi madep unun gat emat wamgwit. Ae nugim yokwisi madep gat ae anelo kabini kisi emat kobogi awit. ⁸ Mani emaron teban toni dakon tapmim dima tan yomgut, do Kwen Kokup ae sanbenek dima egipgwit. ⁹ Pin kop dakon anelo da nugim yokwisi madep maba pigigit. Nugim yokwisi madep unun kalipsigwan egipgut, miktimon amin morap yokwi ani do pankewaldak. Mani kinda Kon, ae mani kinda Sunduk yan yon. Unun maba miktimon pigit, ae aneloni kisi unun gat maba piwit.

¹⁰ Kili unun da kwenon nandanapbo Kwen Kokupgan da amin kinda da madepsi yan tidanek yan yagit,

12:5: Kap 2.9; Ais 7.14; 66.7; PA 19.15 **12:7:** Jut 9 **12:9:** WW 3.1,14; Lk 10.18; 22.31; PA 20.2 **12:10:** Jop 1.9-11; Sek 3.1

“Abisok Pinjopnin da miñat amin kabini yokwikon ban timikdak. Tapmimni altan tenjenajakwan kila amin madep yikdak. Anakwan Kristoni man madepni gat ae tapmimni gat abisok timikdak. Nido, notnin gen yan yomisak amin abisok anelo da kili maba pigik. Unun gildat kalba ae kalbiyo Pinjopnin da inamon gen yan yomgut. ¹¹ Notnin egip egipni panjutnok do dima nandawit. Sipsip Monin da yawikon, ae Pinjop dakon gen yan tenjenawiron da tapmim panek emaron teban tanek uwal abin yipgwit. Kimot do pasol pasol dima awit. ¹² Kwen Kokup gat ae Kwen Kokup ekwan amin morap ji kisik kisik ani! Mani miktim gat ae tap gat yagosil! Nido Sunduk jikon kili pik. Pik da bisap pisipmisok egipdisat yan nandisak, do butjap madepsi nandisak.”

¹³ Nugim yokwisi unun nak maba miktimon pigim yan kanek, miñat unun monji wili anjalagit unun ansopgut. ¹⁴ Mani nugim yipmanek dubagikon miktim amini minikon tagi pidan kisak do singin madepsi dakon piri bamori unun miñat do imgwit. Unudon kin bilak kapbi ae bilak diwari kinda egakwan kilani anakwa nugim yokwisi madep da aripmi dima anupbal asak. ¹⁵ Kili nugim yokwisi madep unun da pakbi gen kaganikon da wandikgit. Pakbi unun pakbi madepsi da yan pak abigek miñat unun yolgut. Nugim yokwisi unun pakbi pak abigek miñat unun anan abigakwan pasiljak yanon da agit. ¹⁶ Mani miktim da miñat anpuluganek gen kagani antan kinakwan nugim

yokwisi madep da pakbi unun wandikgit unun miktim da si nan mudagit. ¹⁷ Anakwan nugim yokwisi madep unun minat do butjap madepsi nandagit, do minat unun dakon monji diwarigat emat wam do kigit. Minat dakon monji unun Pinjkop dakon gen teban morap guramik kimokgon, ae Yesu dakon gen yan tenjeranjek Yesu yolgan amin unun. ¹⁸ Nugim yokwisi unun tap idap da ilenjikon akgit.

13

Jon kilap yokwisi bamori noman tagimal

¹ Ae kanjapbo jon kilap yokwisi kinda tap kagagwan da noman tan wigit. Unun busunji 7 kabi. Anakwan jomi 10 kabi da busunikon kwawit. Anakwa kila amin madep dakon pelit 10 kabi jomikon tawit. Ae busunikon man tan tan awit. Man unun Pinjkop jigilak mibili mibili yan imim dakon man da tawit. ² Jon kilap yokwisi unun kagim unun jon pusiket madep lepat yan yon, unun yombem. Mani kandapmi unun bea dakon yombem, ae gen kagani laion dakon yombem. Nugim yokwisi madep unun da iyi dakon tapmim, ae kila amin yityit tamoni, ae kila agak dakon yan dagok madepni, unun jon kilap yokwisi do imgut. ³ Unun jon kilap yokwisi dakon busunji kinda si kimori da tilak wudani tan imgut, mani aeni kibidagit. Anakwan miktimon minat amin morap kisi unun kan nimmimigek yolgwit. ⁴ Nugim yokwisi madep unun da jon kilap yokwisi do kila

12:17: PA 11.7

13:1: PA 12.3; 17.3,7-12

13:2: Dan 7.4-6

13:3: PA 17.8

amin pi asak do yan mudan imik, do nugim yokwisi madep unun gawak imgwit. Ae jon kilap yokwiyo kisi gawak iminek yan yawit, “Namin amin jon kilap yokwisi yombem? Ae namin amin gat emat aripmi tagi wamjil?”

⁵ Pinjkop da yum kanakwan jon kilap yokwisi unun iyi do nandaban wigakwan Pinjkop do jigilak yan imgut, ae kanek 42 da aripmon pi unun asak dakon yan dagok Pinjkop da imgut. ⁶ Unun gen kagani witdalek Pinjkop jigilak yan imgut. Yan iminek Pinjkop dakon man, ae Pinjkop dakon kokup, ae amin Kwen Kokup ekwan kisi do manji gen yagit. ⁷ Pinjkop da yum kanakwan Pinjkop iyi dakon minjat amin kabikon emat agit. Emat anek dapmanek pabin yopgut. Unun amin kisi dakon kila amin madep tagi egipjak, ae miktimi miktimi kisi, ae gen mibili mibili yon kisi, ae giptimi mibili mibili kisi dakon kila amin madep tagi egipjak dakon yan dagok an ibi. ⁸ Pinjkop da miktim dima wasagit bisapmon amin morap egip egip papiakon mani dima mandagit, unun amin da jon kilap yokwisi gawak imdan. Papia unun Sipsip Monin kalip anjakba kimagit, unun dakon.

⁹ Amin mirakni ton da gen on pakyansi nandani!
¹⁰ Amin kindam dam tebanon pigisak do manjikbi kan, unun dam tebanon pigikdisak. Ae amin kindam emat agak sibakon kimotjak do manjikbi kan, emat agak sibakon kimotdisak. Yo unuden noman tanba, Pinjkop dakon minjat amin kabi butni

13:5: Dan 7.8,25; 11.36; PA 11.2 **13:7:** PA 11.7 **13:8:** Kap 69.28; PA 17.8; 20.12,15; 21.27 **13:10:** Jer 15.2; 43.11; PA 14.12

yawori tanakwa tebai agek nandan gadatni tebaisi abidoni.

Jon kilap yokwisi 2 unun da miktim amin panjkewalgit

¹¹ Aeno jon kilap yokwisi kinda gat kanapbo miktim kagagwan da wigit. Unun jomi bamori sipsip monin dakon jom yombem. Ae gen yogokni unun nugim yokwisi madep kinda egisak dakon yombem. ¹² Jon kilap yokwisi 2 unun da jon kilap yokwisi mibiltok nani dakon kila agak dakon tapmim kisisi yan dagok an imgut. Unun tapmim nan jon kilap yokwisi mibiltok nani da injamon pi agit. Unun tebaisi yoyinjakwan miktim gat ae minjat aminyoni gat da jon kilap yokwisi mibiltok nani gawak imgwit. Jon kilap yokwisi si kimori da tilak wudani tan imgut mani wudani aeni kibidagit. ¹³ Jon kilap yokwisi 2 unun da wasok tapmimi ton madep madep ban agit. Wasok tapmimi ton kinda agit unun yan: Amin da dabilon wasok aban kindap si sonjek Kwen Kokup yipmanjek miktimon piwit. ¹⁴ Pinjkop da tapmim iminjakwan wasok tapmimi ton morap jon kilap yokwisi mibiltok nani da injamon anek miktim amin panjkewalgit. Anek jon kilap yokwisi unun kalip emat agak siba da anjagit, mani abisok egisak gin, unun dakon man yan anjisik do kindap ban wupni pasini do tebaisi yoyigit. ¹⁵ Pinjkop da tapmim iminjakwan egip egip dakon mirim jon kilap yokwisi dakon wupmi wasawit do iban gen yagit. Ae amin morap jon kilap yokwisi dakon wupmi wasanbi do dima gawak imni unun da si dapban kimotdan.

¹⁶ Joŋ kilap yokwisi 2 da tebaisi yoyiŋban amin morap dakon kisit amin tetnikon, ae iŋamnikon tilak kinda yipgwit. Amin isali, ae mani toŋ, ae yoni morapmi amin, ae yoni mini amin, ae oman amin dima ekwaŋ amin, ae oman amin ekwaŋ amin kisi tilak yopmaŋ yomgwit. ¹⁷ Do amin kinda uŋun joŋ kilap yokwisi dakon tilakni mini kaŋ, aminon yumaŋ nok dima asak, ae uŋudon yumaŋ nok dima ani. Joŋ kilap yokwisi dakon tilakni uŋun iyɪ dakon mani, ae mani dakon namba. ¹⁸ Amin nandak nandakni tagisi da joŋ kilap yokwisi dakon namba pakyaŋsi manjiŋ nandisak. On uŋun amin dakon namba. Nambani uŋun 666.

14

Sipsip Moniŋ dakon miŋat amini kap kalugi yawit

¹ Nak aeno kaŋapbo, Sipsip Moniŋ Saion Kabap uŋudon akban kagim. Agakwan amin 144 tausen uŋun gat kisi akgwit. Sipsip Moniŋ dakon man gat ae Datni dakon man gat iŋamnikon mandabi. ² Ae nandaŋapbo wuwik tagisi kinda Kwen Kokupgwan da apgut. Uŋun pakbi madep morapmi dakon wuwik yombem, ae kiririŋ madep da yaŋ agit. Wuwik nandagim uŋun amin da gita tidaŋakwa gen yoŋ uŋun dakon wuwik yombem. ³ Kap kalugi kinda Piŋkop dakon kila amin madep yiyit tamokon yawit. Ae yo 4 kabi egip egipmi toŋ da iŋamon ae kila amin da iŋamon yawit. Amin 144 tausen yaŋ Piŋkop da miktimon miŋat aminyo

da binapmon yokwikon ban yuman nan yopgut, unun kabi dagin kap unun tagi nandaba pisolak. ⁴ Unun amin kabi minat gat yumabi dima anek gwaljigi minisi egipgwit. Kokup morap Sipsip Monin da kik do agit, unun yol awilgan gin. Unun Pinkop da miktimon amin da binapmon ban yokwikon ban yuman nan yopgut, do unun Pinkop da minat amin kabini mibiltoksi timikgit da yansi egipdan. Yan agit, do iyi gat ae Sipsip Monin gat dakon minat amin kabi egipni. ⁵ Top gen kinda dimasi yawit. Gulusunni mini egipgwit.

Anjelo kabî da yan tenjenok awit

⁶ Nak aeno kanapbo ae anjelo kinda kwen binap kwan kagim. Unun da Gen Bin Tagisi dagok dagogi mini amin miktimon ekwan yoyin tenjenosak do yabekbi. Miktimi miktimi minat amin kabi morap, ae geni mibili mibili yon, ae giptim kildani mibili mibili unun kisi do yabekbi. ⁷ Unun da abin gen papmon da yan yagit, “Pinkop do pasal iminek man madepni yan anenotni, nido Pinkop da amin gen pikon yopjak dakon bisap madep kili abik. Pinkop kundu ae miktim ae tap ae pakbi dabil morap wasan yopgut unun gawak imni.”

⁸ Ae anjelo kinda bujon yolgit unun da yan yagit, “Kokup madep Babilon unun kili tuwil kigit. Asi, unun kili tuwil kigit. Kokup madep Babilon amin da yumabi anpakni tebaisi tan yomgut. Ae minat amin kabi morap miktimon ekwan unun kisi da yumabi anpak ani do tebaisi yoyin dekgwit. Unun awit unun wain morapmi yoba nawit yan yombem agit.”

⁹ Uņun aņelo bamot da buņon ae kında da abin gen papmon da yaņ yagit, “Amin kında jon kilap yokwisi ae wupni gawak iminek tilakni inamikon ae kisirikon abidosak kaņ ¹⁰ wain kında nokdisak. Wain uņun Pin kop dakon butjap naņ nokdisak. Wain uņun pakbisi naņ dima anyawot akdisak. Tomni yokwisi yomjak kapmon iyi dakon butjapni tagalban nokdisak. Uņun amin Pin kop dakon telagi aņelo kabi da inamon, ae Sipsip Monin da inamon tepmi madepsi pakdisak. Tip salfa tepmisi sosok uņudon tepmi madepsi pakdisak. ¹¹ Kindap uņun soņakwan tepmi panigwan da mukwa mudok mudogi mini pidokdisak. Amin kında jon kilap yokwisi ae wupni gawak iminek mani dakon tilak abidosok uņun amin yik nandat dimasi asak. Gildari gildari ae pilini pilini tepmi pi mudok mudogi mini pakdisak.”

¹² Uņun bisapmon Pin kop dakon miņat amin kabi butni yawori tanakwa geni guramikgaņ, ae Yesu tebaisi nandaņ gadaņ iman amin uņun tebaisi atdo.

¹³ Kili nandaņapbo Kwen Kokupmon da amin kında da yaņ yagit, “Gen yaņ mandaki, ‘Abisok miņat amin kabi Amin Tagi nandaņ gadaņ iminek kimokgoņ ae don kimotni uņun kisik kisik tagi ani.’” Ae Telagi Wup da yaņsi yosok, “Asisi, amin uņun oman pi madepsi awit uņun yipmaņek yik yawot pani. Yaņ aņakwa aņpak kilegisi awit uņun mandabi da toņ uņun da yolba kisi kini.”

14:9: PA 13.12-17 **14:10:** WW 19.24; Kap 75.8; Ais 51.17,22; Jer 25.15-16; Esi 38.22; PA 16.19; 20.10 **14:11:** Ais 34.10 **14:12:** PA 13.10

Miktimon jap morap bami kili pik tawit, unun pakpak dakon bisap noman tak

¹⁴ Unun da kwenon nak gikwem kwakwagi kinda kagim. Unun gikwemon

“amin dakon monji yombem kinda”

yikban kagim. Busunikon kila amin madep dakon pelit gol ban wasanbi kinda tagit, ae kisitnikon jap bami pakpak siba geni tepmisi kinda abidagit.

¹⁵ Ae anelo kinda Pin kop da Telagi Yut Madepmon da abigi amin unun gikwemon yikgit unun tebaisi yan tidanek yan iyigit, “Sibago abidanek jap bami tan balja. Miktimon jap morap kisi kili pik tan, do abisok jap unun baljoki dakon bisap.” ¹⁶ Yanakwan amin unun gikwemon yikgit unun sibani abidanek miktimon jap pik tawit unun baljagit.

¹⁷ Ae anelo kinda gat Pin kop dakon Telagi Yut Madep Kwen Kokup tosok unun yipmanek wanga pigit. Ununyo kisi jap bami pakpak sibani geni tepmisi kinda abidagit. ¹⁸ Ae anelo kinda alta yipmanek apgut. Anelo unun kindap sosok dakon kila agak dakon tapmim tan imgut. Unun da anelo jap bami pakpak siba geni tepmisi abigit amin gen tebaisi yanek yan iyigit, “Miktimon wain sop kili pik tan mudan, do gak sibago geni tepmisi unun abidanek miktim dakon wain sop unun mandanek timi kindakon gin panmuwukgi.” ¹⁹ Yanakwan anelo sibani abidan miktim dakon wain sop mandanek panmuwuk yopgut. Yopmanek wain sop unun baman til do baman til tamo madep kindagwan similgit. Baman til tamo madep unun Pin kop dakon butjap dakon tilak asak.

²⁰ Uñun wain sop bamañ til tamo madep kokup pap da wanga tagit, wain sop unjudon bamañ tilgwit. Anakwa unjungwan da yawi madepsi pak abigek miñtim kisi witjinban 300 kilomita da arip agit. Anakwan yawi wiñañ wiñ os da gen kagakon ain tim tosoq unun da aripmon wigigit.

15

Anelo 7 kabi da yo yokwisi 7 kabi timikgwit

¹ Ae Kwen Kokupmon tilak masi masimi ae tapmimi tonji kinda noman tanban kagim. Anelo 7 kabi pindakgim. Uñun da amin panupbal ak do yo yokwisi 7 kabi timikgwit. Yo yokwisi unun da mudanakwa ae yo kinda dima noman tosak, Pinkop dakon butjapni wagil mudokdisak.

² Ae yo kinda tap idap madep yombem kagim. Uñun tap idapmon glas gat kindap gat iktagilbi. Tap idap glas yombem unun da kidipmijon amin morapmi akgwit. Uñun amin kabi emaron teban tanek jon kilap yokwisi gat ae wupni gat ae mani dakon nambani abij yipgwit amin. Uñun gita Pinkop da yomgut unun timikgwit. ³ Anek Pinkop dakon oman amini Moses gat, ae Sipsip Monij gat dakon kap yawit. Kap unun yan:

“Amin Tagi Pinkop Tapmim Ami,
 pi masi masimi tapmimi tonji asal.
 Amin kabi morap dakon Kila Amin Madepni,
 anpakgo unun kilegisi ae bamisi.

⁴ Amin Tagi, gak kalon dagin telagisi egisal, do namin da gak do pasalek mango dima yan ankisusak?

Anpakgo kilegisi unun kili altañ noman tawit, do miñtim morap dakon amin da abinjek gawak gamdan.”

⁵ Unun da kwenon aeno sñntoko Pinjkop dakon telagi imal yutni Kwen Kokup tosok unun witaldalgwit. ⁶ Anjelo 7 kabi unun amin panjupbal ak do yo yokwisi 7 kabi timikgwit, unun Pinjkop dakon yut yipmanjek wanja piwit. Unun imal gwaljigi minisi tenñeniñi ton ban pawit. Ae pibirikon imal dak gol ban wasañbi ban panjwasinjek wamgwit. ⁷ Yo 4 kabi egip egipmi ton da kabikon kinda da idap madep gol ban wasañbi 7 kabi anjelo 7 kabi do yomgut. Pinjkop, dagok dagogi mini egi anañ kisak teban, unun dakon butjapni unun idap madepmon tugañ tawit. ⁸ Ae Pinjkop dakon tilimni gat ae tapmimni gat dakon mukwa Telagi Yut Madepmon tugañ tawit. Amin kinda da unungwan aripmi dima wigisak. Anjelo 7 kabi da yo yokwisi 7 kabi ban pini aba daganakwa don wigigi.

16

Idap madep 7 kabi Pinjkop dakon butjapni ton unun tagalgwit

¹ Nandanapbo Pinjkop da Telagi Yut Madepgwan tek madepsi kinda nandagim. Unun anjelo 7 kabi

15:4: Kap 86.9; Jer 10.6-7 15:5: TP 38.21 15:8: 1KA 8.10-11; 2KAG 5.13-14; Ais 6.4

tebai yan tidanek yan yoyigit, “Ji Pinjkop dakon but-jap unun idap madep 7 kabikon ton unun pabidan panji miktimon tagalni.”

² Yoyinban anelo mibiltogi da idap madepni miktimon tagalgit. Yan anjakwan wuda teban yokwisi tepmini madepsi mibili mibili amin jon kilap yokwisi dakon tilakni tan yomgwit, ae wupni wasanbi do gawak imgwit, unun da giptim timon yikgwit.

³ Ae anelo 2 idap madepni tap idapmon tagalgit. Tagalban tap idap amin kili kimakbi dakon yawi yombem agit. Anjakwan tap kagagwan yo morap egip egipmi ton unun kimakgwit.

⁴ Ae anelo 3 idap madepni pakbi madep ae pakbi dabil da kwenon tagalgit. Tagalban pakbi morap kisi yawi dagawit. ⁵ Anjakwan nandanapbo anelo pakbi kila agit unun da yan yagit, “Pinjkop, Telagi Amin, gak abisok egisal, ae kalipsigwan egipgul. Anpakgo wagil kilegisi, do kokwin kilegisi anek yo yokwisi altan yomni do yagil. ⁶ Unun amin kabi da kombi amingo gat, ae minjat amin kabigo gat dapmanakwa yawini tayinigiwit. Yokwi unun awit do gak da yawi kolen yobi non. Yokwi awit dakon kobogi tagi timikgan.” ⁷ Ae nandanapbo altakon da amin kinda da yan tidanek yan yagit, “Amin Tagi Pinjkop Tapmim Ami, gak da amin gen pikon anpakni kokwin an yomisal. Asisi, gen pikon yopyopgo unun wagil bamisi ae kilegisi gin asal.”

⁸ Kili anelo 4 da idap madepni gildaron tagalgit. Tagalakwan Pinjkop da gildat do tapmim iminjakwan

gildat da madep tajej amin soj yomgut. ⁹ Gildat tepmisi sojek, amin unun obisi soj yomgut. Anakwan Pinjop ibipgwit. Pinjop da nandanakwan yo yokwisi unun alantj yomgut, mani but tobil anek mani dima yan anjisiwit.

¹⁰ Kili anelo 5 da jon kilap yokwisi dakon kila amin madep yityit tamokon idap madepni tagalgit. Tagalakwan amin morap jon kilap yokwisi da kila agit, unun pilin tuk madepsi alantj yomgut. Tepmi madepsi nandanej meli injiwit. ¹¹ Tepmi madepsi pawit, ae giptimnikon wuda tawit, unun do nandanej Kwen Kokup dakon Pinjop ibipgwit. Mani anpak yokwisi awit unun but tobil anek manji yom do dima nandawit.

¹² Ae anelo 6 da idap madepni pakbi madep Yupretiskon tagalgit. Tagalban pakbi wagilsi kibidanakwan amin tagi madep gildat da si wisak tetgin da opni do kosit anroman agit. ¹³ Ae kon kapbi mengak yombem pindakgim. Kinda unun nugim yokwisi da gen kagakon da wigit, ae kinda unun jon kilap yokwisi da gen kagakon da wigit, ae kinda kombi amin toptopmi da gen kagakon da wigit. ¹⁴ Unun kon yokwisi kabi wasok tapmimi tonj mibili mibili awit. Unun miktimi miktimi dakon kila amin madepni do dukwan dukwan kiwit. Unun kinj kila amin madep timikba emat amini gat abinj muwukba, Pinjop Tapmim Ami da amin gen pikon yopdisak dakon bisap madepmon Pinjop gat emat wam do muwutdanj.

¹⁵ “Nandani. Nak tepmisi kabo noknok da

tilagon jikon opdísat. Amin kindá díma pagek yík ímalni iyí da kapmatjok toni kañ, unun amin kísik kísik asak. Nido, unun amin molañ díma agípjak, anákwán amin da mayagíni arípmi díma kokdañ.”

¹⁶ Kili koñ da kila amin madep gat emat amini gat timik panabin miktím tím kindá Ibru genon da Amegedon yañ yoñ unudon panmuwukgwit.

¹⁷ Kili anelo 7 da idap madepni kundukon tagalgít. Anákwán Pinjkop da Telagi Yut Madepgan, kila amin madep yityít tamonikon da amin kindá dakon gen kaga da yañ tidaneñ yañ yagít, “Kili unun mudosok.”

¹⁸ Yanákwán mal da dukwán dukwán kisi yang-wit. Anákwa wuwík madepsi noman tanákwán kiriríñ anákwa wudíp madepsi agít. Wudíp unun madepsi daman agít. Miktímon amin egi anañ obañ bisapmon wudíp madep unuden kindá kalíp díma noman tagít. ¹⁹ Kili kokup pap Babilon pudañ ki timi kapbi awit. Anákwa minat amin morap dakon kokup pap morap wagíl tuwíl ki tasik tañ mudawit. Pinjkop da kokup pap Babilon dakon anpak yokwisi do nandaneñ, wain kapmon íban nagít. Wain unun Pinjkop dakon butjap damani. ²⁰ Wudíp daman anákwán miktím tím morap tap binap tawit unun kisisi tap kagagwan pigíwit, ae kabap morap kisisi tuwíl ki minisi awit. ²¹ Anákwa ais sikak madepsi mawit. Ais tím kalon kalon mawit dakon jigini unun 50 kilo da aríp. Unun ais sikak kundukon da amin da kwenon manek,

amin wagilsi dapman panjasik awit. Pinjop da ais sikak unun yipban man obisi panjupbal aban unun do Pinjop ibipgwit.

17

Yumabi minjat madep tomni yokwisi timikgit

¹ Unun anjelo 7 kabi idap madep 7 kabi timikgwit kabikon da kinda da abin yan nayigit, “Gak apbi yumabi minjat pakbi madep madep da kapmatjok yikdak, ni tomni yokwi ban timitdisak unun goliko.

² Miktim dakon kila amin madepni unun minjat gat yumabi morapmi awit. Ae miktim amin morapmi kisi minjat unun gat yumabi awit unun but upbal anek pakbi teban noknok amin yombem awit.”

³ Kili Telagi Wup da butnokon pigi madepsi tu-ganajakwan anjelo unun da nak anjan miktim amin dima ekwan timon anki nepgut. Unudon minjat kinda jon kilap yokwisi gami kinda da kwenon yikban kagim. Unun jon kilap yokwisi da kwenon man morapmisi tawit. Unun man morap unun Pinjop do manji gen mibili mibili tawit. Jon kilap yokwisi unun busunni 7 kabi, ae jomi 10 kabi yan busunikon kwawit. ⁴ Minjat unun imal pagit unun gami ae pili yombem ban pagit. Tilimni gol ban wasanbi mibili mibili, ae tilim tip kildani tagisi ban wasanbi, ae kindirinj yoman nogi wukwisi ban wasanbi ban pagit. Kisirikon kap gol ban wasanbi kinda nan abidagit. Pinjop da dabilon anpak injan injani agit gat, ae yumabi agit dakon garak gat, unun kisisi unun kapmon tujan tawit. ⁵ Minjat

uñun inamnikon mani mandawit. Mani uñun tilak gen yombem kinda. Mani uñun yañ: “Kokup Pap Madep Babilon, uñun Yumabi Miñat Morap gat, ae Anpak Yokwisi Miktimon Tosok uñun dakon Menji.”

⁶ Uñun miñat da Piñkop dakon telagi amin kabi, Yesu nandan gadan iminek mani yañ tenjenawit amin dapban kimakgwit. Uñun miñat kanapbo amin uñun dakon yawini nanek but upbal amin yombem agit. Uñun kan wiripdagek but morap nandagin.

⁷ Kili anelo da yañ nayigit, “Gak nido wuripdakdal? Miñat jon kilap yokwisi busuñi 7 kabi ae jomi 10 kabi uñun da kwenon yikban kwamal, uñun bamot dakon mibili pasili toso, mani nak uñun do golikdisat. ⁸ Jon kilap yokwisi kagil, uñun kalipsigwan egipgut, mani abisok ae dima egisak. Mani gapma kidagi mini yipmanek kwen wikdisak. Winjek Piñkop da anakban wagil pasildisak. Miktim amin, Piñkop da miktim dima wasagit bisapmon amin morap egip egip papiakon mani dima mandagit amin kabi, uñun da jon kilap yokwisi kanek wuripdatdan. Nido, kalip egipgut, ae abisok dima egisak, ae don noman tokdisak.

⁹ “Amin nandak nandakni tagisi da yo uñun do tagi nandaba pisokdisak. Busuñ 7 kabi uñun ileñ 7 kabi dakon tilak asak. Heñ 7 kabikon miñat uñudon yikdak. ¹⁰ Ae busuñ 7 kabi uñun kila amin madep 7 kabi dakon tilak kisi asak. Kila amin madep 5 uñun kili kimakgwit, ae kind a abisok egisak, ae kind a don noman tokdisak. Noman tosak bisapmon bisap pisipmisok egipdisak. ¹¹ Jon

kilap yokwisi unun kalip egipgut da abisok dima egisak, unun kila amin madep unun 8. Mani kila amin madep 8 unun 7 kabi da kabikon nani. Unun wagil pasildisak.

¹² “Ae jom 10 kabi unun jon kilap yokwisi da kwenon kwawit, unun kila amin madep 10 kabi dakon tilak asak. Unun kila amin madep dima noman tan. Mani jon kilap yokwisi unun gat yan dagok kalon; panek kila amin madep pini unun 1 awa da tilak gin akdan. ¹³ Kila amin madep unun nandak nandakni kalon; dagin tokdisak. Anek kila amin pi asak do tapmimni gat ae yan dagokni gat unun jon kilap yokwisi dogin imdan. ¹⁴ Yan aba Sipsip Monin gat emat wamdan. Wamanek Sipsip Monin da wagilsi pabin yopdisak, nido, unun amin tagi morap dakon Amin Tagini, ae kila amin madep morap dakon Kila Amin Madepni. Unun dakon amin kabini unun iyi yan yomgut anek iyi do manin yopgut da geni tagisi guramikgan. Unun amin kabi gat Sipsip Monin gat da emaron teban tokdan.”

¹⁵ Anelo da sanbenek yan nayigit, “Pakbi madep unun kanaki yumabi minat unun da kapmatjok yikban kal, unun amin mibili mibili morap gat, ae giptim mibili mibili gat, ae gen mibili mibili morap gat, ae amin kabi morap egi anan kwan unun dakon tilak asak. ¹⁶ Jom 10 kabi unun pindal, unun jom gat ae jon kilap yokwisi gat da unun yumabi minat do nandaba yokwi tok anindan. Unun obisi antasik anek imalni kisisi wiririkba molan atdisak. Yan anek giptimni dakon sabamni

nanjek kindapmon wagil sokdan. ¹⁷ Pinjkop da iyi kila amin madep 10 kabi unun do nandak nandak yomdisak. Yoban yo morap noman toni do kili nandagit, unun noman tokdan. Unun but kalon anek kila amin madep tapmim pawit unun tapmim kisi jon kilap yokwisi dogin imdan. Yan anakwa wigi Pinjkop da yo morap altan mudoni do yagit unun altan mudokdan. ¹⁸ Minjat unun kal, kokup pap madep unun kila amin madep morap miktimi miktimi egi anan kwan unun da kilani asak dakon tilak asak.”

18

Babilon kili tasik tagit

¹ Unun da kwenon kanapbo anelo kinda gat Kwen Kokup yipman pigit. Unun man bini ton, ae tilimni tagisi do anek miktim madepsi tentenagit. ²⁻³ Tebaisi yan tidanek yan yagit, “Miktim morap dakon amin Babilon gat yumabi morapmi awit. Unun dakon waini tebaisi ban yan nawit. Ae miktimi miktimi dakon kila amin madepni gat kisi yumabi unun gat awit. Babilon amin unun yoni morapmi ae yaworisi egek kisik kisik egipgwit, do miktimi miktimi monen ilit pi an amin unun yoni morapmi amin dagawit. Anpak yokwisi unun agit do kokup pap madep Babilon unun kili tasik tak! Unun kili tasik tak! Unun abisok kon da egipni dakon tamo dagak. Kon yokwisi gat, ae minam injani yokwisi mibili mibili gat kisi unudon ekwan.”

⁴ Ae Kwen Kokupgwan da amin kinda da yan yagit, “Minjat amin kabino, ji kokup pap unun

18:2-3: Ais 13.21; 34.11-14; Jer 50.39; PA 14.8 **18:4:** Ais 48.20; Jer 50.8; 51.6,45; 2Ko 6.17

yipmanjek abigini. Anpak yokwi asak, do unun gat agek yokwi di abam. Ae yokwi agit dakon kobogi timitdisak, do jiyo kisi di timikbam. ⁵ Yokwini panabin kakwanakwan Kwen Kokup da tilagon wigigit. Pin kop da yokwi morapni agit unun pakyan si nandan kimokdok. ⁶ Ji unun yumabi minjat da amin do anpak yokwisi nian anyomgut, unun anpak yan gin an imni. Unun da pakbi teban tebaisi kapmon wasagit. ⁷ Unun iyi dakon man awigek yumabi mibili mibili agit. Do yokwi morapmi unun agit, unun da aripmonsi tepmi madepsi iminjakwa kunam morapmisi tatjak. Unun iyi dakon man awigek yan yosok, 'Nak minjat madep egisat, do minjat madep da yityit tamo madepmon nak unudon yikdat. Nak minjat sakwabat da yan isal dima egisat. Jigi abisok dima altan namni anjakwa kunam aripmi dima takgen. Aripmi dimasi.'

⁸ "Yan yosok, do yo yokwisi mibili mibili gildat kalongin altan imdan. Sot yokwisi noman tokdan, ae amin morapmi kunam tatdan, ae jap do madepsi akdan. Anjakwa kindap da Babilon sonban pasildisak. Pin kop Amin Tagi, unun tapmimni madepsi, unun da Babilon dakon anpak kili kokwinikgit, do si tasik tosak do yagit.

⁹ "Miktimi miktimi dakon kila amin madep unun gat yumabi awit, ae yaworisi ae kisik kisiksi egipgwit, do kokup pap unun sosak dakon mukwani pidanban koni bisapmon bupmi kunam yo anjek but yokwisi anjek egipdan. ¹⁰ Kanba tepmi

18:5: WW 18.20-21; Jer 51.9 **18:6:** Kap 137.8; Jer 50.15,29; 2Tes 1.6 **18:7:** Ais 47.7-9 **18:8:** PA 17.16 **18:9:** Esi 26.17; 27.30-35

yokwisi unun paban kanjek, madepsi pasoldan. Anek dubagikon da agek yan yokdan, ‘Bupmi, bupmisi, Babilon gak. Gak madepsi, ae kokup pap tebaisi! Bisap awa kalonji dogin yokwi agil dakon kobogi yo yokwisi kili noman tan gamik!’

¹¹ “Amin da sanbenjek yo kabini dima yumdan, do monej ilit ilit amin miktimi miktimi ekwan unun da Babilon do nandanjek bupmi kunam yo anek but yokwisi anek egipdan. ¹² Yumanj nok dakon yoni unun gol, silwa, ae tip tomni wukwisi, ae kindirinj tomni wukwisi, ae imal kwakwagi tagisi, ae imal gami mibili mibili, ae silka imal, ae kindap kibanj tagisi morap kisi, ae elepan jom banj yo mibili mibili wasawit kisi, ae yo mibili mibili kindap tomni wukwisi banj wasawit gat, ae ain kinda mani bras, ae ain gat, ae tip tilakni mibili mibili yan. ¹³ Ae yomanj nok dakon yoni diwari kisi tanj yongwit, unun sinamon, ae jap pangalak ak yo mibili mibili, ae mukwa kibanj tagisi sogok dakon yo, ae bit nelak kibanj tagisi mibili mibili, ae wain, ae olip dakon nelagi, ae plaua tagisi gat, ae wit. Ae bulmakau, ae sipsip, ae os, ae oskon da amin pawil tamo, ae oman monji kisi. Unun yo morap amin di da sanbenjek yumyumi mini. ¹⁴ Monej ilit ilit amin unun da yan yokdan, ‘Yo tagisi morap unun butgo dasi timikgenj yan nandagil, unun yo morap gak da dubagisikon tonj. Yo tagisi morapgo yumanj nogi wukwisi gat, ae tilingo tagi tagi morapgo unun kisisi pasil mudanj. Ae sanbenjek dima pindatdisal.’

¹⁵ “Ae amin monej ilit pi unun yo morap banj awit, anek unun kokup papmon monej morapmisi

timikgwit, unun amin da kokup pap unun da tepmi yokwisi pakdisak unun kanek madepsi pasoldan. Anek dubagisikon da agek kunam bupmiyo anek but yokwisi egipdan. ¹⁶ Anek yan yokdan, ‘Kokup pap madep, wagil bupmisi! Kalip imal kwakwagi tagisi, ae imal gami mibili mibili ban pagil. Yan anek giptingo gol, ae tip kildani tagisi, ae kindirin yuman nogi wukwisi ban pantilim agil. ¹⁷ Bisap awa kaloni dogin monen morap unun gat ae tilim gat unun wagil tasik tan mudan.’

“Tap wakga pawilgan amin morap gat, ae tap waggakon da miktin njaknjarikon kwan amin morap gat, ae tap waggakon pi an amin morap gat, ae amin morap tap idapmon monen ilit pi an amin, unun kisi Babilon da dubagikon agek ¹⁸ kindap son imjak dakon mukwa kanek, yansi yan tidokdan, ‘Kokup pap madepsi oden kinda dimasi tagit.’ ¹⁹ Yan yanek miktimon kimbaban timik busunikon maba wugakwa, bupmi kunam yo anek but yokwisi anek egipdan. Yan anek yan tidanek yan yokdan, ‘Kokup pap madep awa, bupmisi! Tap wakga dakon ami morap tap idapmon akwan unun kokup pap dakon monen morapni ban timigek yoni morapmi amin dagawit. Bupmisi! Bisap awa kaloni dogin unun kokup pap wagilsi tasik tosok!’

²⁰ “Kwen Kokup gat, ae Pin kop dakon minat amin kabi gat, ae yabekbi kabi gat, ae kombi amin kabi gat, ji kisi unun kokup papmon abisok yo noman tosok unun do kisik kisik ani. Pin kop da

18:16: PA 17.4 **18:17:** Ais 23.14; Esi 27.27-29 **18:18:** Esi 27.32 **18:20:** GT 32.43; Ais 44.23; Jer 51.48

uñun kokup pap da jikon anpak yokwi andangut uñun kokwinigek uñun dakon kobogi imisak.”

²¹ Gen uñun yan mudanakwan anelo tapmimi ton kinda da tip madep kinda abidagit. Tip uñun wit misinikgan dakon tip dakon tilak, madepsi. Tip uñun anenak maban tap kaga pigigit. Maban pigakwan yan yagit, “On asat yan gin uñun kokup pap madep Babilon abidan tebaisi maba pigikdisak. Maba pigakwan amin da ae sanbenek dima kokdan. ²² Do Babilon gagon gita dakon gen, bo kinam kirin dakon gen, bo kwen, ae sanbenek gak da nagalgwan dimasi yokdan. Ae kisit kilda amin pi mibili mibili an uñun sanbenek gagon dima egipdan. Ae tip madep da wit misinikgan dakon wuwigi gagon sanbenek dima tosak. ²³ Ae lam dakon tentenji ae sanbenek dima tentenan gamjak. Ae minjat eyo anek sonok an dakon wuwigi gagkwan ae sanbenek dima noman tokdan. Kalip monen ilit amingo miktim amin morap da dabilon wukwisi da egipgwit. Gak amin pankilit wasok mibili mibili anek miktimi miktimi dakon amin top pankewalgil.”

²⁴ Pinkop da kanban uñun kokup pap da kombi amini dapgut ae minjat amin kabini dapgut dakon gulusunni madepsi tan imisak. Ae miktimon minjat aminyo uwal da dapba kimakgwit, uñun dakon gulusunni kisi Babilon dogin tosak.

19

Amin da Babilon tasik tagit uñun do kisik kisik

18:21: Jer 51.63-64; Esi 26.21 **18:22:** Ais 24.8; Esi 26.13

18:23: Jer 7.34; 16.9; 25.10 **18:24:** Jer 51.49; PA 17.6

awit

¹ Ae unun da kwenon, amin morapmi Kwen Kokup egek madepsi yan tidon dakon wuwik yombem nandagim. Yan tidanek yan yawit, “Pinkop ankisino! Nin dakon Pinkop unun dagin nin yokwikon ban timikgit. Unun man madepni ton ae tapmimni ton. ² Asisi, Pinkop gen kokwini unun wagil bamisi ae kilegisi gin asak. Yumabi minat madep unun da miktim amin morap gat yumabi anpak anek panupbal agit. Yan agit do Pinkop da kobogi yokwisi imisak. Minat unun Pinkop dakon pi monji dapban kimakgwit, do kobogi imisak.”

³ Ae yan tidanek yawit, “Pinkop ankisino! Kindap da unun kokup pap sogit dakon mukwani dagok dagogi mini wigisak!” ⁴ Kila amin 24 kabi gat, ae yo 4 kabi egip egipmi ton nwanben anek Pinkop kila amin madep yityit tamonikon yigakwan gawak imgwit. Anek yan yawit, “Unun asi. Pinkop ankisino!” ⁵ Ae Pinkop dakon kila amin madep yityit tamokon da amin kinda da yan tidanek yan yagit, “Pinkop dakon pi monji, Pinkop do pasalek ekwan amin, ji amin mani mini ae mani ton, ji Pinkop ankisini!”

Sipsip Monin minat panakwan jap noknok madep awit

⁶ Ae amin morapmisi da yan, gen yanba nandagim. Wuwikni unun pakbi madepsi pokdok unun dakon wuwik yombem. Ae unun kiririn da yan madepsi yawit. Unun da yan tidanek yan yawit, “Pinkop ankisino! Amin Taginin Pinkop

Tapmim Ami kila amin madep egek pini asak. ⁷ Kili Sipsip Moniŋ da miŋat pakdisak dakon bisap kili noman tosoċ, ae miŋat iyi kili tagap tak da egisak, do butnin tagisi anakwa kisik kisik madepsi anek mani yaŋ anċisinen. ⁸ Piŋkop da imal kwakwagisi tagisi, tenŋenini madepsi, ae gwaljiċi mini unun miŋat do imgut.” (Unun imal kwakwagisi ae tagisi unun Piŋkop dakon amin da anpak kileċisi awit dakon tilak asak.)

⁹ Ae anelo da yaŋ nayiċit, “Gen yaŋ mandaki: ‘Amin unun Piŋkop da Sipsip Moniŋ da miŋat pakdisak da soŋnok madepmon kini do yaŋ yomisak unun amin kisik kisik tagi ani.’” Ae sanbenek yaŋ nayiċit, “Gen on Piŋkop dakon gen bamisi.” ¹⁰ Kili nak anelo dakon kandap da kapmatjok ŋwakben anek gawak im do agim. Mani yaŋ nayiċit, “Yaŋ dima abi! Gak gat ae not kabigo gat da Yesu da gen yaŋ tenŋenagit unun nandan gadan amin kabi, ji da Piŋkop oman animan, unuden ċin nak kisi oman amini ċin, do Piŋkop nan gawak ibi. Nin nandaman, Yesu Kristo da gen yaŋ tenŋenagit, unun daċin amin panŋtagap aban kombi gen yoŋ.”

Jon da amin kind a os kwakwagikon yikban kagit

¹¹ Nak kanapbo Kwen Kokup witdal kigit. Anakwan os kwakwagi kind a akban kagim. Unun oskon amin kind a yikgit, mani unun yaŋ: Pini Do Butdasi Nandanek Anegisak Amin, ae Anpak Bamisi Asak Amin. Gen kokwin pi asak, ae emat asak, unun anpakni kileċisi nan yolek

19:7: Ais 61.10; PA 21.2 **19:9:** Mt 22.2 **19:10:** Ya 10.25-26; PA 22.8-9 **19:11:** Kap 96.13; Ais 11.4; PA 1.5; 6.2

asak. ¹² Dabilni unun kindap dakon milen asip yombem, ae busunikon kila amin madep dakon pelit morapmi tan ingwit. Giptimikon man kinda mandawit. Iyi gin kalon da man unun nandisak, amin diwari dima nandan. ¹³ Imal dubak pagit unun yawi madepsikon anbm abi nan pagit. Mani unun Pinjkop Dakon Gen. ¹⁴ Kwen Kokup dakon emat amin unun osni kwakwagi unudon yigek yol anan kiwit. Imal kwakwagisi gwaljigi minisi ban pawit. ¹⁵ Emat agak siba geni tepmisi kinda, gen kaganigwan da wigit. Unun emat agak siba nan amin kabi morap miktimi miktimi egi anan kwan unun pabin yopdisak.

“Ain kirin nan abidank amin kabi morap kilani tebaisi akdisak.”

Yan anek wain sop pintil tip gapmakon wain sop baman tildisak. Unun Pinjkop Tapmim Ami dakon butjapni dakon tilak asak. ¹⁶ Imal dubaknikon, ae sunlikon man yan mandabi: “Kila Amin Madep Dakon Kila Amin Madepni, ae Amin Tagi Dakon Amin Tagini.”

¹⁷ Ae gildaron anelo kinda akban kagim. Unun da minam kwen binap akwan do yan tidank yan yoyigit, “Ji Pinjkop dakon jap noknok madep do abin muwutni. ¹⁸ Anek kila amin madep dakon giptim timni noni, ae emat amin dakon mibiltok amini dakon giptim timni noni, ae amin tebai dakon giptim tim, ae os gat ae amin os kwenon yikgan amin dakon giptim tim, ae amin morap kisi dakon giptim timni noni: oman dima ekwan amin,

19:12: Dan 10.6; PA 1.14; 2.17

19:13: Ais 63.1-3; Jn 1.1,14

19:15: Kap 2.9; PA 1.16; 14.20

19:16: PA 17.14

19:17: Esi

ae oman amin, ae amin mani mini, ae amin mani ton kisi dakon giptim tim noni.”

¹⁹ Ae jon kilap yokwisi gat, ae miktimi miktimi dakon kila amin madepni gat ae emat amini gat da abin muwukgwit. Unjun amin unjun oskon yikgit gat ae emat amini gat emat wam do anek muwukgwit. ²⁰ Mani jon kilap yokwisi unjun gat ae kombi amin toptopmi gat timikgwit. Kombi amin toptopmi unjun jon kilap yokwisi da dabilon wasok tapmimi ton morapmi anek amin panjewalban tilakni abidawit, ae wupni wasanbi do gawak imgwit. Jon kilap yokwisi gat kombi amin toptopmi gat dima kimagek egakwal gapma madep tip salfa unjungwan tugawit da sosok unjungwan maba pigigimal. ²¹ Anakwa amin unjun oskon yikgit, unjun da emat agak siba gen kaganikon tagit unjun nan jon kilap yokwisi dakon emat amini kisi morap dapban kimakgwit. Anakwan minam morap da unjun emat amin dakon giptimni nanek buri tugawit.

20

Sunduk bilak 1 tausen yan dam tebanon egipgut

¹ Kili kanapbo anelo kinda Kwen Kokup yipman pigit. Kisirikon gapma kidagi mini dakon yoma wital abidagit, ae nap teban madepsi kinda kisi abidagit. ² Unjun da nugim yokwisi madep kalipsigwan egipgut unjun abidagit. Mani kinda Kon, ae mani kinda Sunduk yan yon. Anelo da nap teban nan waman anteban aban bilak 1 tausen egipgut. ³ Kili anelo da maban gapma kidagi

minikon pigigit. Pigakwan gapma unun dakon yoma sopmanek tebaisi anteban agit. Miktim amin morap aripmi dima panjekwaljak, yan do agit. Unun bilak 1 tausen mudanakwan don yipman dekba bisap pisipmisok galaktoknikon egipdisak.

⁴ Ae kila amin madep yityit tamo pindakgim. Unun tamokon amin unudon yikgwit. Pin kop da gen kokwin ani do yan mudan yomgut. Ae amin uwal da tegi mandan daganek dapba kimakgwit, unun dakon wupni pindakgim. Kalip unun amin da Pin kop dakon gen tebaisi abidanek, Yesu do yan ten tenok anakwa uwal da dapba kimakgwit. Unun amin jon kilap yokwisi gat ae wupni wasanbi gat do dima gawak ingwit, ae unun dakon tilakni inamnikon ae kisitnikon dima timikgwit. Unun amin egip egip aeni abidanek Kristo gat kila amin madep egakwa bilak 1 tausen agit. ⁵ Unun wasok wasok amin kimoron da pidon amin. (Amin diwari kimakgwit unun bisapmon egip egip dima abidawit. Unun bilak 1 tausen mudanakwan don egip egip abidokdan.) ⁶ Amin unun wasok wasoksi aeni pidoni amin unun kisik kisik tagi ani. Pin kop da unun amin iyi do manjigit, do kosiri kinda gat aripmi dima kimotdan. Unun Pin kop ae Kristo dakon mukwa sogok amin egek Kristo gat bilak 1 tausen kila amin madep egipdan.

Sunduk tasik tagit

⁷ Bilak 1 tausen unun mudanakwan, gapma kidagi mini dakon yoma witalakwa Sunduk dam tebani yipman abigikdisak. ⁸ Unun wanga

abigek miŋat aminyo miktimi miktimi ekwan
 uŋun paŋkewaldisak. Uŋun amin kabi mani
 Gok ae Megok yaŋ yoŋ. Sunduk da emat ani
 do paŋmuwutdisak. Emat amin kabini dakon
 tilakni uŋun tap kidipmiŋon niman toŋ yombem
 morapmisi. ⁹ Uŋun miktimi miktimi da apgwit.
 Abiŋ Piŋkop dakon miŋat amin kabi gat ae kokup
 pap Piŋkop da si galak taŋ imisak uŋun gat
 aŋgwasiwit. Mani Kwen Kokup da kindap da piŋ
 emat amin uŋun soŋ yoban mini awit. ¹⁰ Sunduk
 da amin paŋkewalgit, do Piŋkop da Sunduk maban
 gapma madep tip salfa tepmisi soson uŋudon
 pigigit. Joŋ kilap yokwisi gat ae kombi amin
 toptopmi gat uŋun bamot uŋun gapmakon kili
 egipgumal. Uŋun amin kapbi kalbi ae gildari tepmi
 madepsi bisap mudok mudogi mini paŋegipdan
 teban.

Gen pi madepsi noman tagit

¹¹ Uŋun da kwenon kila amin madep yityit tamo
 madep kwakwagi kinda tanban kagim. Ae uŋun
 tamokon amin kinda yikban kagim. Anakwan
 miktim gat ae kundu gat yipman dek kigimal.
 Ae sanbeŋek dima tagimal. ¹² Amin kimakbi
 pindakgim. Uŋun amin mani toŋ, ae mani mini,
 uŋun kila amin madep yityit tamokon noman akg-
 wit. Kili anelo da papia di kwiniŋkwit. Ae papia
 kinda kisi kwiniŋkwit, uŋun egip egip dakon pa-
 pia. Anakwan Piŋkop da uŋun papiakon gen tawit
 uŋun pindagek amin kimakgwit uŋun dakon anpak

20:9: 2KA 1.10 **20:10:** Kap 11.6; PA 19.20; 21.8 **20:12:** Dan
 7.9-10; Mt 25.31-46; Ya 17.31; 2Ko 5.10; PA 13.8

kalip awit unun kokwin agit. ¹³ Ae amin kalip tap idapgwan kimakgwit unun kisi Pinjkopmon kwa anpak morap kalip awit unun kokwin agit. Ae kimot gat ae Amin Kimakba Yopbi Tamo unun bamot yum pindagakwal amin kimakgwit unun Pinjkopmon kwa amin kalon kalon da anpak kalip awit unun pindagek kokwin agit. ¹⁴ Kili kimot gat ae Amin Kimakba Yopbi Tamo unun maban pakbi idap kindap sosok unudon pigigimal. Pakbi idap unun kindap sosok unun amin kosiri kindagat kimokgon dakon tamoni. ¹⁵ Amin morap mani egip egip papiakon dima ton unun kisi maba pakbi idap kindap sosok unudon pigiwit.

Pinjkop da yo morap panjaluk akdisak

(Kilapmi 21–22)

21

*Kundu kalugi gat ae miktim kalugi gat
pindakim*

¹ Unun da kwenon nak kundu kalugi gat ae miktim kalugi gat pindakim. Kundu mibiltogi gat miktim mibiltogi gat unun kili wagil kin pasilgimal. Ae tap idap sanbenek dima tagit. ² Ae Pinjkop dakon telagi kokup pap unun kagim. Unun Jerusalem kalugi. Unun koko Pinjkop gat egipgumal, da Kwen Kokup yipman dek pigit. Unun tilimni tagisi, minjat da amin pak do tagap tanek tilimni tagisi pasak unuden. ³ Ae kila amin madep yityit tamokon da

20:13: Ro 2.6; 1Pi 1.17; PA 2.23; 22.12 **21:1:** Ais 65.17; 2Pi 3.13 **21:2:** Ais 52.1; 61.10; Ibr 11.16; 12.22; PA 3.12 **21:3:** MS 26.11-12; Esi 37.27; Sek 2.10; 2Ko 6.16

amin tek kinda madepsi yan tidanban nandagim, “Nandani. Abisok Pin kop dakon yut amin da bi- napmon tanakwan iyi dakon minat amin kabini egipni. Asi, Pin kop iyi unun gat egipdan. Anek unun dakon Pin kopni egipdisak. ⁴ Unun kabikon kunam pakbi morap dabilikon toni unun kisisi wiririkban kunam sanbenek dima tatdan. Ae amin sanbenek dima kimotdan, ae but yokwi anek sanbenek kunam dima tatdan, ae tepmi sanbenek dima pakdan. Nido miktim kalipmi gat yoni kalipmi gat unun kisisi pasil mudokdan.”

⁵ Amin unun kila amin madep yityit tamokon yikgit, unun da yan yagit, “Nandani, yo morap abo kalugi an mudon.” Aeni sanbenek yan yagit, “Gen on mandaki. Nido gen gayisat unun bamisi. Amin morap kisi da unun do tagi nandan gadagi.” ⁶ Yanek yan nayigit, “Pi unun mudosok. Nak Wasok Wasoksi ae Mibisi egisat. Pi morap asat unun wasip anan asat. Amin kinda tegi bap tosak kan, nak da yipbo pakbi dabil egip egipmi ton ae yuman nogi mini unun nosak. ⁷ Amin kinda emaron teban tosak kan, nak da unun yo morap iben. Anek nak da Pin kopni egapbo unun da monjino egipjak. ⁸ Mani amin pasalek duwalik pukwan, ae nandan gadat dima an, ae anpak yokwisi morapmi an, ae amin dapba kimokgon amin, ae amin yumabi an, ae sot mawomyo anek yo tapmimi ton pawilgan amin, ae kokup kidat do gawak yoman amin, ae amin morap top yon, unun iyi da kokup-

21:4: Ais 35.10; 65.19; PA 7.17 **21:5:** 2Ko 5.17 **21:6:** Ais 55.1; Jer 2.13; Jn 7.37; PA 1.8,17; 22.17 **21:7:** 2Sa 7.14; 1KAG 17.13; Kap 89.26-27 **21:8:** Mt 25.41; PA 20.15; 22.15

mon pigikdan. Uñun pakbi idap kindap tepmini madepsi salfa tip da sosoñ uñun. Uñun amin kimot kosiri kind a gat añ uñun dakon tamoni.”

Jon da Jerusalem kalugi kagit

⁹ Kili añelo kind a nagon apgut. Añelo uñun añelo 7 kabi idap madepmon Pin kop dakon butjap mudosak do amin pañupbal ak dakon yo yokwisi 7 kabi timikgwit uñun kabikon nani kind a. Añelo yañ nayigit, “Gak apbi Sipsip Moniñ dakon miñatni abisok pakdisak uñun goliko.”

¹⁰ Kili Telagi Wup da butnokon pigi madepsi tugañakwan añelo uñun da nak bedañ anki ileñ madepsi ae kwensi kind a uñudon nepgut. Anki nepmanjek Pin kop dakon kokup pap Jerusalem noligit. Uñun koko Pin kop gat egipgumal, da Kwen Kokup yipman dek pinban kagim. ¹¹ Pin kop dakon tilimi madepni uñun kokup papmon tenñenagit. Tenñeni uñun ñwaktñwarisi, tip yuman nogi wukwisi dakon tenñeni yombem. Uñun tip jasp a yombem da yañ tenñenagit. Uñun glas yombem gwaljigi minisi. ¹² Kokup pap yoma nagalni uñun kwensi. Uñun yoma kagani 12 kabi, ae añelo 12 kabi uñun yoma kagakon akgañ. Añakwa Israel amin kabi 12 dakon man yoma domon tawit. ¹³ Nagal uñun dakon diwari gildat da wisak tetgin do yoma kagani kapbi tawit. Ae not tetgin nani do yoma kagani kapbi tawit. Ae saut tetgin nani do yoma kagani kapbi tawit. Ae nagal uñun dakon diwari gildat da pigisak tetgin nani do yoma kagani kapbi kisi. ¹⁴ Kokup pap uñun dakon nagal tebaisi tosak do kwiñiri tip daman 12 kabi

mibilikon tawit. Sipsip Moniŋ dakon yabekbi 12 kabi dakon mani unun tipmon tawit.

¹⁵ Anjelo gen nayigit unun da kalin kirin gol ban wasanbi kind a abidagit. Unun nan kokup pap gat, ae nagal madepni unun gat, ae nagal unun dakon yoma kagani tilak yop do abidagit.

¹⁶ Kokup pap dakon ilenŋ 4 kabi dakon tilakni unun kalonŋ gin. Dubagini ae madepni unun kisi aripginsi. Anjelo da kokup pap kalin kirinŋni nan tilak yipban 2,200 kilomita da arip agit. Kokup pap dakon ilenŋ 4 kabi dakon tilakni gat, ae kokup pap dakon kwen nani kisi dakon tilakni unun aripginsi.

¹⁷ Ae kokup pap dakon nagal kisi tilak yipgut. Yan aban nagal kwen wigigit dakon tilakni 65 mita da arip agit. Tilak yopyop unun amin da tilak yopmangan unun nanŋin anjelo da nagal dakon tilak yopgut.

¹⁸ Kokup pap dakon nagal unun tip jaspera ban wasanbi. Anjek kokup pap unun gol jimjimi minisi ban wasanbi. Kokup pap unun dakon gol unun glas yombem gwaljigi minisi. ¹⁹ Kokup pap dakon nagal dakon teban tokni unun Pinjop da tip yuman nogi wukwisi mibili mibili unun ban panŋilim agit. Tip 1 tagisi nagal mibilon tagit unun tip jaspera. Ae tip 2 unun tip pili unun tip sapaia. Ae tip 3 unun tip aget. Ae tip 4 unun kalikaligi, unun tip emeral. ²⁰ Ae tip 5 unun tip sadonikis, unun gami kwakwagi kisi. Tip 6 unun tip giman konilian. Ae tip 7 unun kilonkilonŋ, unun krisolait. Ae tip 8 unun tip kalikaligi njwaknjwari kind a unun beril. Ae tip 9 unun tip kilonkilonŋ njwaknjwari kind a unun

topas. Ae tip 10 unun tip krisopres. Tip 11 unun tip aiasin. Ae tip 12 unun tip gami n̄wak̄n̄wari kindā tip ametis. ²¹ Yoma kaga 12 kabī unun pel 12 kabī, unun kindir̄n̄ yuman̄ nogi wukwisi. Yoma kalon̄ kalon̄ pel madep kalon̄ kalon̄ ban̄ wasan̄bi. Kokup dakon kosit pap unun gol ban̄gin wasan̄bi. Gol unun gwal̄jigi minisi glas yombem.

²² Unun kokup papmon Telagi Yut Madep kindā dima tan̄ban kagim. Nido, Amin Tagi Pin̄kop Tapmim Ami gat ae Sipsip Monin̄ gat da iyi Telagi Yut Madep da yan̄ egip̄gumal. ²³ Unun kokup papmon gildat gat kanek gat pini minī. Nido, Pin̄kop dakon tilimni da kokup pap ten̄ten̄an̄ imisak. An̄akwan Sipsip Monin̄ unun kokup pap dakon lamni da yan̄ egisak. ²⁴ Amin miktimi miktimi egi an̄an̄ kwan̄ da unun kokup pap dakon ten̄ten̄ikon agip̄dan̄. An̄akwa miktimi miktimi dakon kila amin madep da yoni tagi unun yuman̄ nogi wukwisi un̄judon pan̄opdan̄. ²⁵ Unun kokup papmon pilin̄ kindā dima tokdisak, do kokup pap dakon nagal dakon yoma dagok dagogi minī pisokdan̄. ²⁶ Amin miktimi miktimi egi an̄an̄ kwan̄ unun yoni tilimi tagisi ton̄ gat ae man madep imim an̄pakni kisi timigek un̄judon pan̄opdan̄. ²⁷ Mani pilin̄ tuk dakon yo gat, ae amin an̄pak yokwi mibili mibili an̄ gat, ae top yon̄ amin unun kokup papmon dima pigini. Min̄at aminyo Sipsip Monin̄ dakon egip̄ egip̄ papiakon mani ton̄, unun dagin unun kokup papmon pigikdan̄.

21:23: Ais 60.19-20; PA 22.5 **21:24:** Ais 60.3,5 **21:25:** Ais 60.11 **21:27:** Ais 52.1; Esi 44.9; 1Ko 6.9-10

22

Jon da egip egip pakbi gat ae egip egip kindap gat pindakgit

¹ Kili anelo unun da pakbi madep kinda noligit. Unun egip egip yomyom pakbi. Unun glas yombem gwaljigi minisi agit. Pakbi unun Pin kop gat ae Sipsip Moniŋ gat da kila amin madep yit yit tamogwan da pak abigisak. ² Pak abigi kokup pap da kosit madep da binapsi nan pak kisak. Pakbi da ilenji teri teri egip egip yomyom kindap akdak. Kindap unun bilak kinda da butgwan bami pot do kosiri 12 yan an an asak. Kanek morap kisi bami tan tan asak. Ae kindap unun dakon tami unun amin miktimi miktimi egi anan kwan unun sotni panmilip ak do ton. ³ Yo morap jobit pabi unun yo morap sanbenek ae dima tokdan. Pin kop gat ae Sipsip Moniŋ gat dakon kila amin madep yityit tamo unun kokup papmon tosak. Ae Pin kop dakon oman amin da gawak imdan. ⁴ Gawak iminek tomno dabilni kokdan, ae Pin kop dakon mani oman amini da inamnikon tokdisak. ⁵ Piliŋ ae sanbenek dima tokdisak. Anakwan lam gat ae gildat gat pini mini, nido Amin Tagi Pin kop da iyi minjat amin tentenan yomdisak. Anakwan oman monjini kila amin madep dagok dagogi mini egi wigikdan.

⁶ Anelo unun da yan nayigit, “Gen unun bamisi. Amin morap kisi da unun do tagi nandan gadagi. Pin kop Amin Tagi da kombi amin dakon wup pan tagap aban geni yan tentenon. Unun aneloni

22:1: Esi 47.1 **22:2:** WW 2.9; Esi 47.12; Jol 3.18; Sek 14.8

22:4: Mt 5.8; PA 3.12 **22:5:** Dan 7.18,27; PA 5.10; 20.6; 21.23,25

22:6: PA 1.1

yabekban abin yo tepmisi noman togi unun oman monjini nin noligit.”

Yesu apdisak

⁷ Yesu da yosok, “Nandani! Nak kili ununjok apdisat. Miñat aminyo kombi gen on papiakon toñ unun guramikgan, unun kisik kisik ani.”

⁸ Nak Jon da gen on nandanek yo unun pindakim. Yo unun nandan pindakyo an mudanek anelo unun yo morap noligit unun da kandap mibilon nwanben anek gawak im do agim. ⁹ Mani yan nayigit, “Yan dima abi! Nak kisi oman amin gin. Nak gak gat ae kombi amin kabi notgoni unun dakon pi isalji, ae amin morap on papiakon gen toñ unun guramikgan amin unun dakon pi isalni. Pin kop kalon nanjin gawak ibi.”

¹⁰ Yan nayinek sigin yan yagit, “Kombi gen on papiakon toñ unun dima sopman anteban abi. Nido, Pin kop da yo morap unun akdisak dakon bisap kili kwan tak. ¹¹ Amin anpak yokwi an, unun yum pindagakwa sanbenek ani. Ae amin anpak injan inani an, unun yum pindagakwa sanbenek ani. Ae amin anpak kilegisi an, unun yum pindagakwa sanbenek ani. Ae amin telagi ekwan, unun yum pindagakwa telagi sigin egipni.”

¹² Yesu da yan yagit, “Nandani, nak tepmisi apdisat. Miñat amin morap tomni yom do apdisat. Anpak awit dakon kobogi do tomni anpak awit da aripmon yomdisat. ¹³ Nak Wasok Wasoksi ae Mibisi egisat. Nak mibiltok egisat, ae bunjansi

egisat. Nak yo morap dakon mibili. Pi morap asat unjun wasip an an asat.”

¹⁴ Amin pabi pigik dubakni sugon unjun kisik kisik tagi ani. Unjun da egip egip yomyom kindap dakon bami tagi pan noni, ae unjun da kokup pap da yoma kaga nan tagi pigini. ¹⁵ Anakwa amin anpak yokwisi an amin gat, ae amin sot wamwam anek yo tapmimi ton pawilgan amin gat, ae yum-abi an amin gat, ae amin dapba kimokgon amin gat, ae kokup kidat gawak iman amin gat, ae amin anpak toptopmi do galak tanek yolgan, unjun amin morap Pinjkop dakon kokup pap da wannga egipdan.

¹⁶ “Nak Yesu, nak da anelono yabekgo jikon obik da panmuwukbi jikon gen on yan tenjenosok. Nak kila amin madep Dewit da babi kabikon da gugit wugit unjun nak mani. Ae nak Dewit Dakon Monji, ae nak Wisawisa Dakon Gik Pap Madepsi Tenjenosok unjun.”

¹⁷ Telagi Wup gat ae minat unjun Sipsip Monin pakdisak gat da yan yomal, “Gak apbi.” Ae amin morap gen on nandani ji kisi yan yoni, “Gak apbi.”

Amin kinda tegi bap tosak kan tagi apjak. Amin kinda pakbi nok do nandisak kan, unjun amin abinek egip egip yomyom pakbi tagi nosak. Unjun Pinjkop da but galak do yumsi nimisak.

Jon da gen on papiakon ton unjun nandani amin do gen tebaisi yipgut

¹⁸ Nak da on papiakon kombi gen ton unjun nandani amin morap do gen tebai yipmandat. On gen tosogon amin kinda gen kinda gat sanbesak

kañ, amin panupbal ak yo yokwisi on papiakon toñ, unun Pinkop da sanbeñban unun aminon noman tañ imdañ. ¹⁹ Ae amin kinda da kombi gen on papiakon toñ di wiriritjak kañ, Pinkop da yo tagisi on papiakon toñ unun wiririk imjak. Anakwan unun amin egip egip yomyom kindapmon jap dima pan nosak, ae Pinkop da telagi kokup papmon unudon dima egipjak. On papiakon unun dakon geni toñ.

²⁰ On yo morap do yañ tenjenok asak amin da abisok yañ yosok, “Asisi, nak kilisok unun apdisat.”

Asi, Amin Tagi Yesu gak apbi. ²¹ Amin Tagi Yesu dakon nandañ yawotni unun Pinkop dakon miñjat amin kabikon tosak.

PIN^{KOP} GEN
The New Testament and Psalms in the Yopno Language
of Papua New Guinea
Nupela Testamen na Buk Song long tokples Yopno long
Niugini

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 11 Nov 2022 from source files dated 9 Oct 2020

b683ce50-d820-5bfc-8471-d8ee080be106